



TIRA IQEDDSEN

**AWAŘEN
IWEZHEN**

AWAŘEN IWEZHEN

Tařayit n mmis ħima ad yuyur di tiyit d uqessah

¹ Awařen iweznen n Suliman, mmis n Dawud, ajeđid n Israyil,

² ħima ad issen *bnadem* tiyit d tarbiyyet

ħima ad ifhem awařen n řefhamet,

³ ħima ad iqbeř tarbiyyet d řeęqeř,

tasegda d řheqq d teřdiqt,

⁴ ħima ad iwc asfarz i iqubbaniyyen,

tussna d uħadur i uħudri.

⁵ Ejj amięis ad as iseř u ad yarni di řefhamet nnes

u wenni ifehmen *ejj it* ad ikseb řeqnaeet.

⁶ ħima ad ifhem awař iweznen d lmatal,
awařen n imięisen d tnefssect nsen yuęęen.

⁷ Tigǵwudi n SIDI d beddu n tussna,
ibuħařiiyyen sseħqaran tiyit d tarbiyyet.

⁸ Seř, a mmi, ęar tarbiyyet n babac

u war tagi ca taęuri n yemmac,

⁹ maęar nitenti *ad iřint* d ict n temrist tecna x uzeęif nnek

d tseddyin *izewwqen* i yiri nnek.

¹⁰ A mmi inu, mařa xsen imednab ad cek ęwan,

war d asen ttegg ca array.

¹¹ Mařa nitni qqaren “Uyur akidneę, ejj ad nħama i *assizzeř n* idammen,

ejj aneę ad negg ict n texceft i umezdag, břa ssibbet.

¹² Ejj aneę ad ten nsarđ am ddaren, amecnaw *ťsarđ* řaxart,
am kemřem marra, amecnaw inni ihekkwan deg weħfur.

¹³ Ad naf marra řeħwayeę yiyřan ařtas,

tudrin nneę ad tent neccur s tkeccađt.

¹⁴ Cek ad tenđared taqedduħt nnek jaraneę,

ad ęarneę *tiři* marra ict n tecyart.”

¹⁵ A mmi inu, war kidsen gęur deg webrid,

siggweę ađar nnek x umesruq nsen,

¹⁶ maęar idaren nsen ttazřen ęar řęar

u nitni ttęęiqen maħend ad ssizzřen idammen,

¹⁷ maęar s řbařeř ad tettwabezzeę traccia

zzat i tiřřawin n marra min ęar ięa wafriwen

¹⁸ u nitni ttħaman idammen nsen

u tteggan taxceft i řeęmur *n yixef* nsen.

¹⁹ Ammu ięan ibriden n kuř ijj wenni ittazřen ęar arbeħ,

aqa aya iteřtef řeęmar n sides.

²⁰ Tiyit tbarreħ s jħhed *dih*a barra,

nettata tessgaęeed tmijja nnes deg wazzayen.

²¹ Mani ibda řharaj, tettbarrař nettat,
yar wadafen n tewwura n tendint tessawař awařen nnes.
²² “Ař meřmi i řa qqimen iqubbaniyyen ttexsen taqubbanect
u imestehzayyen itteejib asen i yixef nsen uřecci u *ař meřmi* i řa carhen ibuhařiyen tussna?
²³ Dewřem řar uwebbex inu!
Xřarem, necc ad xawem ssfarręęy Arruř inu s ufeyyed,
awařen inu ad awem ten eeřmey.”

²⁴ “Aqa zeema řayıř u kenniw war texsem,
sswizzdey necc afus inu, *maca* uřa d ijj war d as iřekkar,
²⁵ u tendarem cwar inu
u awebbex inu war t teqbiřem kenniw.
²⁶ *X uyenni* uřa d necc ad deřceř x uhellek nwen,
necc ad *zzaywem* stehzey xmi dd i řa yas unexřie nwem,
²⁷ mařa anexřie nwem yudes-dd am yijj n ureddeř u ahellek nwem ad dd-yas am ict n třaryadř,
mařa řeřřart d teggwudi wdant-idd xawem.
²⁸ Xenni nitni ad xafi dd-řayan, maca necc war dd-ttarriř,
nitni ad xafi arzun, *maca* war d ayi ttifen,
²⁹ minzi nitni carhen tussna
u war ixřaren *ad třfen di* tiggwudi n SIDI.
³⁰ Nitni war đfaren ca řar řecwar inu,
marra awebbex inu nřaren t.
³¹ Nitni ad ccen zi řyiřet n webrid nsen
u ad jjiwnen s ixemmimen n yixef nsen,
³² minzi ařař n iqubbaniyyen ad ten iney
u afucceř n ibuhařiyen ad ten issehellek.
³³ Wi řari i řa isřen, ad izdeř di řaman
u netta ad yareyyeř zi tiggwudi n tuęeffna.”

Tiyit ad iřđa tamemmit

2¹ Mmi inu, mařa cek tqebřed awařen inu
u teřđid tewřiyat inu
² mařend amezzuř nnek ad iwc taynit i tiyit,
uř nnek ad imeyyeř řar řefhamet,
³ *wah* mařa tettřayid-dd x tussna,
ad tessxedmed tmijja nnek i řefhamet,
⁴ mařa cek tarezzud xas am *tarezzud* x nnuřart
u ad xas tarzud am *tarezzud* x txuba innuffaren,
⁵ xenni ad tfehmed i tiggwudi n SIDI
u ad tafed tussna n AREBBI.

⁶ Mařar SIDI itticc tiyit,
zeg uqemmum nnes tetteffey-dd tussna d řecepř.
⁷ I iřđiqen issewjed asen twiza,
i yenni igguren nican *issewjed asen* adurri,

⁸ ħima ad qqimen tet̄t̄fen deg imesraq n řĥeqq
uca netta ad issar abrid n imeddukař nnes iřdiqen.

⁹ Xenni ad tfehmed tasegda d řĥeqq,
uřa d tařdiqt,
kuř řatar iřebĥen.

¹⁰ mařar tiyt ad tadeř deg wuř nnek
u tussna ad tarĉa x řeemar nnek.

¹¹ Aĥadur ad xak iĥĉa,
řefhamet ad xak tessar

¹² ... maĥend ad cek tfekk zeg webrid n ueeffan,
zeg weryaz nni, am issawař, issfarray timesřayin.

¹³ zeg inni isemĥen deg imesraq n teřdiqt
maĥend ad uyuren ibriden n taġest,

¹⁴ inni ifarrĥen maĥend ad ggen řřar,
u ssřiwřiwen x řexdaeat n řřar,

¹⁵ n yenni iġan imesraq nsen faryen
d yenni imeyyřen ssa d ssa di řatarat nsen.

¹⁶ ... maĥend ad cek tfekk zi temřart tbarranect,
zi temřart zi barra i ittřarran s wawařen nnes,

¹⁷ tenni isemĥen deg umeddukkeř n temzi nnes
u tettu řeahd n AREBBI nnes.

¹⁸ Minzi nettat thekkwa řar řmewt ak-d taddart nnes
u řatarat nnes *hekkwant* řar řexyařat n imettan.

¹⁹ Marra inni řares i řa yadfen, war dd-itteiqqiben eemmarř
u war ttakkwaĉen eemmarř řar imesraq n tudart.

²⁰ ... ħima ad tuyured abrid n iřebĥanen
u ad tet̄t̄fed deg imesraq n imseggaden.

²¹ mařar iřdiqen ad zedyen di temmurt
u inni igguren di nnican ad dayes qqimen.

²² Ieeffanen ad ttwaqeĉen zi temmurt
u iyeddaren ad zzayes ttwaqeřen.

Tiyit di tuddart n kuř ass

¹ Mmi inu, war tettu ccariaa inu,
3ejj uř nnek ad iĥĉa tiweřša inu.

² mařar nitni ad ac dd-awyen ařtas n wussan
ura d isegg^wusa n tudart d řehna.

³ Tamexsiwt icewwaren d teřdiqt war tent tejjid ad zzayek ffyent.
Qqen itent řar yiri nnek, ari tent x teřwiĥt n wuř nnek

⁴ u af nniemet d řeeqeř iřebĥen di tiřawin n AREBBI d yewdan.

⁵ Tiqq di SIDI s wuř nnek kuřci
u war ttcařa x řefhamet *n yixef* nnek.

- ⁶ Ssen it di marra ibriden nnek,
xenni netta ad iseggem imesraq nnek.
- ⁷ War ttegg ixef nnek d amiġis.
Ggwed SIDI u beċċed x min iġan d aċeffan.
- ⁸ Aya ad yiři d agenfu i ttebbudt nnek
d arratuġ i ixsan nnek.
- ⁹ Weqqar SIDI s wagra nnek
u s tmezwarut n marra sşabet nnek.
- ¹⁰ *Xenni* ad ttwaccuren řehrit nnek s ufeyyed
u tisirin *n uđiř* ad ssefyent s binu n jdid.
- ¹¹ Mmi inu, war nettar tarbiyyet n SIDI
u war ttarra aerur x uwebbex nnes,
- ¹² mayar wenni isseizza SIDI ad t ieaqeb eawed,
am ittegg babas ak-d mmis wenni x yarđa.
- ¹³ Sseed n bnađem nni yufin timessna
uřa d bnađem nni ikessben řefhamet,
- ¹⁴ mayar tasebbabt nnes teřra x tsebbabt di nnuqart
u řyiġet nnes teřra x wurey ittissiqen,
- ¹⁵ nettat tiyřa x tyaqutin
u marra min di *tzemmaređ* ad temmezred
war izemmar akides immqudda.
- ¹⁶ Tuzzeggart n wussan *yares* deg ufus nnes,
agra d ccan aqa-ten x užeřmađ nnes,
- ¹⁷ Ibriden nnes d ibriden n řeđrafet
u marra imesraq nnes aqa-ten d řehna.
- ¹⁸ Nettat d tacejjart n tudart i yenni řares iřesqen
u kuř ijjen wenni dayes itteřřfen, ad yiři d ameseud.
- ¹⁹ SIDI igga dsas n temmurt s tiyit nnes,
u s řefhamet nnes igga ijenwan.
- ²⁰ Zi tussna nnes dduqzent-dd řeunřarat yuġyen
u ssudumen-dd iseynuten nnda.
- ²¹ Mmi inu, war tent tejjid ad ffyent zi tiřřawin nnek,
ħđa aftan d uħađur,
- ²² *mayar* ad iřin d tudart i řeemar nnek
uřa d nniemet i yiri nnek.
- ²³ Xenni ad tuyured abrid nnek di řaman
u war tettneqrıđed deg uđar nnek.
- ²⁴ Mařa truħed ad tezzřed, war ggur ad tenxeřeed
u *xmi* i řa tezzřed, ggur ad yizid yiđes nnek.
- ²⁵ War ttegg^wed zeg unexřie n deyya
uřa zeg wareyyeb s *ufus* n ieađfanen xmi dd i řa yas.
- ²⁶ Mařar SIDI ad ac yiři d asenned nnek
u netta ad iħđa afus nnek zi tsarrift.

3:18 'tacejjart' - niya 'addag' ('iddagen').

3:21 'tent' - awař-a iceyyar řar tiyit d řefhamet i x issawař umseřmad n tiyit di nnumru 13 n wudem-a.

- ²⁷ War qeṭṭee řxar x bab nnes,
mařa aqa-t deg ufus nnek maḥend ad *t* tegged.
- ²⁸ War qqar i umqarreb nnek ‘Ruh uca eqeb-dd, tiwecca ad *ac-tt* wcey!’,
mařa *tamesřact* aqa-tt akidek.
- ²⁹ War nekkwi řyar ak-d umqarreb nnek,
umi akidek izeddey di řaman.
- ³⁰ War temmcubbut ak-d ḥed břa ssibbet,
mařa netta war i d ac iggi řyar.
- ³¹ War ttasem zeg ijj n bnađem itteggem řexcunet
u ḥḍa maḥend war tettixḍared uřa *d ijj* zi marra ibriden nnes.
- ³² Mařar wenni itteffyen zeg webrid, aqa-t d nnei i SIDI,
maca ittegg řaman nnes deg iřdiqen.
- ³³ Nneēřet n SIDI *aqa-tt* x taddart n ueffan,
maca tazeddiyt n imseggaden ad tt ibarek netta.
- ³⁴ Mařa d imestehzayyen ad *zzaysen* isstehza netta,
maca mařa imwaḍeen ad *asen* iwc řxaḍar nnes.
- ³⁵ Imiřisen ad warden ccan,
maca ibuhařiyyen ad ssarbun řefḍiḥet x yixef nsen.

Egg uř nnek x tiyt

- 4**¹ Sřem, kenniw iḥenjiren, řar tarbiyyet n tbatat
u ḥekkarem mliḥ maḥend ad teksim tussna teccur s řefhamet,
- ² mařar necc ad awem wcey tiyuri iřebḥen,
war semmḥem di ccarica inu.
- ³ Mařar necc tuřa-yi d mmis i baba,
areqqay d uyenni n *mmis* zzat i wudem n yemma,
- ⁴ uca netta isseřmed ayi, inna ayi
“Ejj uř nnek ad ittef deg wawařen inu,
ḥḍa tiweřša inu u *xenni* ad teddared!”
- ⁵ Jbed-dd řarek tiyt, jbed-dd řarek řeeqeř,
war tettu u war tḥeyyid x wawařen n uqemmum inu.
- ⁶ War semmeḥ di tiyt, *xenni* nettat ad cek teḥḍa,
seizz itt u nettat ad cek tessar.
- ⁷ Beddu n tiyt aqa jbed-dd *yarek* tiyt
u jbed-dd *yarek* řefhamet s marra min řarek.
- ⁸ Sgaēēed itt-idd, xenni nettat ad cek tesgaēēed,
nettat ad ac tegg ccan mařa cek tḍarēēed as.
- ⁹ Nettat ad ac tewc ict n temrist tecna x uzeřif nnek,
ad ac tewc ijj n ttaj izewwqen.
- ¹⁰ Seř, a mmi inu, u ksi awařen inu,
xenni ad mmarnin iseg^wusa n tudart nnek.
- ¹¹ Ssřemdey ac abrid n tiyt,
necc nedhey cek di řatarat iseggmen.
- ¹² Mařa tuyured, ařurif nnek war ittneḥřsar,
mařa tazzeř, war ttneqriḍed.

¹³ Cebbar di tarbiyyet, war xas temmsebda,
hda tt, mayar nettat d tudart nnek.

¹⁴ War ggur x umesruq n ieffanen
u war ttidif abrid n yenni itteggan řyar,

¹⁵ heyyed xas, war xas ggur,
heyyed xas uca edu t.

¹⁶ Mayar nitni war tettsen am war ggin tuëeffna
u ides nsen ittrař asen mařa war ssneqriđen hed,

¹⁷ mayar nitni ttetten ařrum n řyecc
u nitni sessen binu zi tmeđa n řexcunet.

¹⁸ Amesruq n imseggaden am tifawt n uteffu n řřarř
nni tarenni deg useqseq yares ař imyar wass qac.

¹⁹ Abrid n ieffanen am tağest,
nitni war ssinen min di i ya nqarđen.

²⁰ Mmi inu, ewc taynit i wawařen inu,
ewc amezzu y nnek i wawařen inu,

²¹ war ten ttejja ad yeřfen zi tiřřawin nnek,
xemmeř iten daxeř deg wuř nnek,

²² mayar nitni d tudart i wenni ten i ya yafen,
d agenfu i weysum nsen.

²³ Hda uř nnek x marra min izemmar ad ittwařđa,
mayar zzayes ffyen ižewran n tudart.

²⁴ Kkess ixarriřen n uqemmum nnek
uca sbeëëed xak afaryeđ n iyencicen nnek.

²⁵ Ejj tiřřawin nnek ad xzarent řar zzat
u ad iřin wabriwen nnek xezzen řar *min iğan* arendad nnek.

²⁶ Wařa řatař n uđar nnek
u ejj ad iřin marra ibriden nnek sarrřen.

²⁷ War farrey řar yeřfus ni y řar zeřmeđ,
sbeëëed ađar nnek zi tuëeffna!

Acřem i uyekk^{wi} zi temyart tabarranit

5¹ Mmi inu, ewc taynit i tiyit inu,
ewc amezzu y i řefhamet inu,

² mařend cek ad tewced řađur
u iyencicen nnek ad eessen x tussna.

³ Minzi iyencicen n temyart tabarranit ttudumen s tamment n teyrařt ,
u aney nnes d areqqay x zzect,

⁴ maca řar uneggar *aqa-tt* d tamarzagt am cciř,
teqđeë am iij n ssif s tnayen n wudmawen.

⁵ Iđaren nnes hekkwan řař řmewt
u iřuraf nnes ttwaneddhen řar řaxart.

⁶ ařami war tetřifed *emmarř* abrid n tudart,
gguren iřuraf nnes ssa d ssa břa mma tessan.

⁷ Xenni řexxu, *a* iħenjiren, sřem-dd ħari
u war tħeyyadem ca x wawařen n uqemmum inu.
⁸ Sigg^wej abrid nnek xas
u war tades tawwart n taddart nnes,
⁹ ħima war tetticed ccan nnek i inneđni
u isegg^wusa nnek i wenni itteqsihen,
¹⁰ ħima ibaraniyyen war ttjawanen deg wagra nnek
u marra arber nnek war dd-ittis di taddart n wenni war ittwissnen
¹¹ u ad tzeħhared ħar uneggar
xmi i ħa tettwacc arrimet nnek d weysum nnek..
¹² *Xenni* ad tinid “Mammec ggiy necc carhey tarbiyyet
u *mammec* inđar uř inu awebbex
¹³ u necc war sřiř ħar tmijja n wenni i d ayi idarrben
u war wciř amezzuř inu i imseřmaden inu!

¹⁴ Eřaħař tuřa ufiř ixef inu di eřam kuř řar
di řwest n wegraw *n řgens* u n tmesmunt!”
¹⁵ Suw aman zeg wanu nnek
uřa d aman issizzřen zi řařay n řeunřar nnek.
¹⁶ Ejj ad ssefyen waman *n řeunsar* nnek barra,
tařawin x wazzaryen.
¹⁷ Ejj iten ad iřin i cek weħdec
war iři i ibarraniyyen i din zzatek.
¹⁸ Ad yiři řeunřar nnek ittwabarek
u farħ i temyart *zeg wussan* n temzi nnek.
¹⁹ Tudadt ieizzen uřa d tiřeydet n wezřar icewwaren *netta!*
Ejj ibbac nnes ad cek ssiwiyyen di marra ussan,
sellem ixef nnek řebda ħar tayri nnes!

²⁰ Mayemmi, *a* mmi inu, mma ggur ad tewđid deg weħsin n temyart d tbarranect
u ad tdarreed i weħsin n temyart zi barra?
²¹ Mayar ibriden n bnadem aqa-ten *din* zzat i tiřřawin n SIDI
u netta yarzu di marra imesraq nnes.
²² Řmuəsiyyet nnes ad tħebbes ačeffan
u s iseřwan n ddnub nnes ad ittacedd
²³ Netta ad immet umi war din tuři tarbiyyet
u netta ad iweddar s tubbuheřya nnes tameqqrant.

Aħeřtu đidd i tesyunin tičeffanin ak-d iwdan

6¹ Mmi inu mařa tdewřed d amarhun i umqarreb nnek,
tewcid ticti n ufuř i yijj n ubarrani,
² *mařa* tdewřed teqqned zeg wawařen n uqemmum nnek,
tettwaħebbsed zeg wawařen n uqemmum nnek,
³ *xenni* egg ta, mmi inu, u senjem ixef nnek zeg ufuř n umqarreb nnek:
uyur, bendeq u zeyyar x wenni cek yudsen.

⁴ War ticc ca iḍeṣ i tiṭṭawin nnek
uṛa d anudem i wabriwen nnek.
⁵ Senjem ixef nnek am tyeḍdet n weḡzar zeg ufus *nnes*
u am yijj n ujdīd zeg ufus n unegmar.

⁶ Uyur ḡar tkedfet, *a cek, a* ameeguz,
xzar mammec tuyur nettat u dweṛ d amiḡis.

⁷ Waxxa nettat war ḡares bu umgewwed
niḡ aweqqaf niḡ ṛḡakem,

⁸ *waxxa amenni* nettat tessewjed aḡrum nnes deg unebdu,
teyru macca nnes di ṛweqt n tmeyra.

⁹ Aṛ meṛmi i ḡa teqqimed tezzṛed, *a cek aya* ameeguz?
Meṛmi i ḡa tekkared zeg iḍes nnek?

¹⁰ Arni cwayt n yiḍes, arni cwayt n uwarrec,
arni cwayt n ubuzzeṛ s ifassen imunen,

¹¹ ad xak dd-iwḡa zzeṛd am ijj n uxewwan
u ṛeḡben nnek am yijj n weryaz ḡar iḡa ṛesnaḡ.

¹² Bnadem i war isekk^win, aryaz n ṛḡecc,
iggur s ijj n uqemmum iccurren s min iḡewjen.

¹³ Iḡemmez s tiṭṭawin nnes,
issawaṛ s iḡaren nnes,
ittceyyar s iḡewḡan nnes.

¹⁴ Uṛ nnes *iccur* s ṛexdaḡat,
inekkwa ṛebda ṛḡar, ittsebbab imenḡiyyen.

¹⁵ X uyenni deḡya ad dd-yas wareyyeb nnes,
deg ict n tecti ad ittwarz netta am war din ittiṛi ugenfu.

¹⁶ Setta n tmesṛayin-a icarreh itent SIDI,
wah sebea aḡa-tent d nnei i ṛeḡmar nnes:

¹⁷ tiṭṭawin n nnfaxet, ijj n yiṛes issxarriqen,
uṛa d ifassen issazzaṛen idammen imezdagen,

¹⁸ ijj n wuṛ inekkwān timeḡmaḡ tieeffanin,
iḡaren nni ittḡeḡiqen maḡend ad azzṛen ḡar min iḡan d aḡeffan,

¹⁹ ijj n ucehhad nni dd-ideḡḡen i ixarriqen
uṛa wenni ittsebbaben imenḡiyyen jar tawmat.

²⁰ A mmi, ḡḡa tewṣiyyet n babac
u war tejjī taḡuri n yemmac,

²¹ Qḡen itent ṛebda x wuṛ nnek,
cedd itent ḡar yiri nnek.

²² Maṛa teggured *deg webriḡ*, ggur aya ad cek igewwed,
maṛa tezzṛed, aya ad cek iḡḡa,
maṛa tfaḡed aḡa man aya ad kidek issiweṛ.

²³ Minzi taṣṣiyyet d ijj n ṛefnar d ccariea d ict n tfawt
u awebbex n tarbiyyet aḡa-ten d abrid n tudart

²⁴ nni cek i ḡa iḡḡa zi temḡart taḡeffant,

zi řehruđ izewwqen n yiřes n temyart zi barra.

²⁵ War eecceq ca deg wuř nnek azri nnes

u war ssneřsir ixef nnek s wabriwen nnes,

²⁶ minzi zi ssibbet n ict n temyart taqeřbećt,

bnadem izemmar ad iksi myir ict n txebbazt n weyrum,

u tamyart n ijj n weryaz nneđni aqa tarezzu řeemar iyřan.

²⁷ Ma izemmar řed ad yarbu timesi deg weřsin n warruđ nnes

břa mma ad yary warruđ nnes? .

²⁸ Ma izemmar řed ad yuyur x tirjin yareqqen

břa mma ad cemđen iđaren nnes?

²⁹ Ammu *i iřa* wenni i ya yadfen yar temyart n umqarreb nnes,

kuř ijjen wenni tt i ya iħadan, war ittwiřsib d amezdag.

³⁰ War sseřqarra aceffar umi netta yucar

řima ad issyiwen řeemar nnes mařa netta dayes řaz.

³¹ Mařa ittwarf, ammu xas i ya ixegęř sebea n tseqqar.

Ad iwc marra min yares di taddart.

³² Wenni ittegggen zina ak-d ict n temyart, war yares bu wuř imten.

Wenni ittegggen aya, ad ittđarra řeemar nnes.

³³ řefđiřet d nneřřet ad tent yaf

u řeřya nnes war imeřři ca.

³⁴ Mařar asam d tafqeřt yareqqen n weryaz

u netta war ittessen ařinni deg wass n wentaqem.

³⁵ War iřesseb ddeyyet u war tt iqebbeř,

waxxa tessemyarid di tarzeft ead s wařřas.

Arcam n weryaz wenni ijjin ad iyekk^{wi} ixef nnes

7¹ Mmi inu, řđa awařen inu
u xemmeř tiweřřa inu yarek.

² Řđa tiweřřa inu u cek ad teqqimed teddared

u řđa ccariea inu am mummu n tiřř nnek.

³ Qqen itent yar iđewđan nnek,

ari tent x teřwiřin n wuř nnek.

⁴ Ini i tiyit “Cem d wećma!”

u semma řeřřamet ‘Ameddukkeř’,

⁵ mařend *nitenti* ad cek řđant zi temyart tabarranect,

zi temyart zi barra i ittyarran s wawařen nnes.

⁶ Mařar zi řkazi n taddart inu,

jar ccebbac *n řkazi* sewđey yar wadday,

⁷ u sewđey yar iqubbaniyyen *inni war itřřikin*,

jar iřramen řekkarey ijj n uħudri s wuř war imten.

⁸ Netta izwa abrid yar teymart nnes

u iřřef abrid yar taddart nnes.

⁹ Yar tbambast, yar řiřet n wass,

di řařay n řiřet u n tubbarcent,

¹⁰ xzar, *aqā* ict n temyart tusa-dd i umsagar akides, deg warruḍ n řeqḥab u s teḥraymect n wuř.

¹¹ Netta tettsexxeb u tettýewway, iḍaren nnes war qqimen ead di taddart.

¹² Uca di barra, uca eawed deg izuray, yar marra tiyemmar *n ibriden* tettḥama nettat.

¹³ Nettat tetṭef it u tessudem it, teqjar nettat udem nnes, tenna as:

¹⁴ “Tiwhibin n řehna aqa-tent akidi, ass-a ssqeffrey lwueud inu.

¹⁵ S uyenni i dd-ffýey maḥend ad cek mmsagarey, maḥend ad xak arzuý u *ammu i cek* ufiy.

¹⁶ Necc ssuy maltat x qama inu, s řizarat izewwqen imuden s řeqten azdad zi Miřra.

¹⁷ Necc rucey tassut inu s mirru d ssibri d řqarfa.

¹⁸ As-dd, ejj aney ad nejjíwen timexsa ař ateffu, ejj aney ad narr mezri i tayri.

¹⁹ Maýar aryaz war iḡi di taddart, netta *isafar* igg^wej aṭṭas.

²⁰ Iksi ict n tkemmust *n tmenyat* n nnuqart akides, ad yaregg^weḥ netta yar wass n tziri.”

²¹ *Ammu* i t tetṭef s waṭṭas n řḥard nnes, teýwa it s řeḥruḍ nnes izewwqen n iyencicen nnes.

²² Netta yardef it am ijj n uyenduz igguren yar řgurnet, amecnaw s snaseř yar umarret n ubuhaři.

²³ ařam i dd as tcarreg fritca tsa, am ijj n wejḍiḍ iḍwin deg ijj n wenday u war issin aqa wanita ittwagg ḍidd i tudart nnes.

²⁴ *Xenni* řexxu, *a* iḥenjiren, sřem-dd ýari u sřem yar wawařen n uqemmum inu.

²⁵ Ejj uř nnek war ittweddir deg ibriden nnes, war ttmeyyiř cek yar imesraq nnes.

²⁶ Maýar nettat tessnuqqeb aṭṭas n yenni tt yezmen u imýar aṭṭas *leadad n* yenni tenya nettat.

²⁷ Taddart nnes *teccur s* ibriden yar řaxart, inni iḥekk^wan yar ixxamen n daxeř n řmewt.

Ařayi n tiyit

¹ Ma war tettřiýi Tiyit u war tesgiccid řefhamet tmija nnes?

² X tqiccat n řegęudi, x webrid, mani ttemseřqan imesraq tbedd nettat d abeddi.

³ Yar uyezdís n tewwura, yar wadaf n tendint mani i ya tadfed x tewwura, tettřaya nettat s jjehd:

⁴“I kenniw, *a* iryazen, ttřayiy
u tmijja inu *tteffey* řar tarwa n bnađem.
⁵*Kenniw* ihafiyyen, fehmem min ięan d aftan
u *kenniw* ibuhařiyyen, fehmem *min ięan deg* wuř.
⁶Sřem, minzi ad ssiwřey awařen igellđen atřas
u anurzem n iyencicen inu *ijebb-dd* timesřayin iseggđen,
⁷mařar aney inu ad yini tidett s neyyet
uca tuęeffna d nnei i iyencicen inu.
⁸Marra awařen n uęemmum inu *tteffyen-dd* zi tsegda,
war daysen uřa d ict n řřajet ixnunnesen niy ifaryen.
⁹Aqa-ten marra řfan i wenni di teęa řefhamet
uřa d řeqyas i yenni *ixsen* ad afen tussna.
¹⁰Ksim tarbiyyet inu, war ięi nnuqart
uřa tussna ktar x wurey iqquren ittissiqen,
¹¹Mařar tiyit řsen zi tyaqutin
u marra min di izemmar *bnadem* ad imezři,
war *izemmar* ad dayes ittarwes.

¹²Necc, Tięit, zeddyęy řar weftan
u ttafey tussna s uřadur.
¹³Tigg^wuda n SIDI d acrah n řřar d nnfaxet d tnefssect d umesruq aęeffan
u necc carrhey uřa d aęemmum *iccur s* řexdaęat.
¹⁴řari acawar d twiza,
necc d řefhamet, řari jjeħd.
¹⁵Zzayi ģekkmen ijeęiden
u inni řar ięa řřulřa ttareyysen s tsegda.
¹⁶Zzayi ģekkmen řřukkam d tarwa n tařiřet,
marra řquđat n temmurt.
¹⁷Necc ttexsey marra inni d ayi ittexsen
d yenni xafi yarezzun zic, ad ayi afen.
¹⁸Agřa d ccan aqa-ten řari,
agřa iqqimen d tsegda.
¹⁹Fruta inu tecna x wurey ittissiqen u x wurey azdad
u řřięet inu teędu nnuqart iqquren.
²⁰Necc ggurey x umesruq n tsegda,
di řwest n imesraq n řřeqq,
²¹řima ad arrey inni d ayi ittexsen ad třfen ijj n tesyart d řwart
u necc ad ccurey ixammen n txubay nsen.
²²SIDI igga ayi *am* umezwaru n webriđ nnes,
am umezwaru n tmeęga nnes deg weģař uya.
²³Zi řebda necc ttwagey *am ijj n řřakem*, zeg umezwaru,
zi řweqt nni di ittwagg dsas n temmurt,
²⁴umi war din tuyi ead aman yuęyen, necc ttwaxeręey-dd,
umi war din tuyi ead řęunřarat ccurent s waman.

²⁵ Qbeř mma ad ttwaggen idurar,
qbeř tiwririn, tuya xeřqey-dd necc.

²⁶ Netta tuya ead war dd-ixřiq tammurt d iyyaren
uřa d tamezwarut n teejjact n ddunnit.

²⁷ Umi netta igga ijenwan, tuya-yi din,
umi netta yarcem ict n tqurarect x wudem n waman yuğřen.

²⁸ Umi netta igga iseynuten sennej,
umi ttwajehdent řeunřarat n waman yuğřen,

²⁹ umi netta igga i řebřar aymir nnes,
mařend aman war dd-eeddun řumur nnes,
umi netta iebar dsusa n temmurt,

³⁰ tuya-yi d ijj n bu-řenæet řar uyezdis nnes.
Necc tuya-yi marra d tarrit n mezri ass x wass,
ttirarey zzat i wudem nnes řebda,

³¹ ttirarey di marra tammurt nnes
u tuya tarrit n mezri inu ak-d tarwa n bna dem.

³² Xenni řexxu, a iřenjiren, řem-dd řari!
Sseed n yenni iřetřan ibriden inu.

³³ Sřem řar tarbiyyet
u dewřem d imiřisen u war netřarem *tarbiyyet*.

³⁴ Sseed n bna dem nni řari isřan,
wenni iřřfen acbar řar tewwura inu zeg wass ař wass,
iřetta x tyemmar n tewwura inu,

³⁵ mařar wenni i d ayi yufin, yufa tudart
u ad iřřef řxađar n SIDI.

³⁶ Wenni i d ayi ixđan, iyezzem řeemar nnes,
marra, inni d ayi icarrhen, ttexsen řmewt.

Řeeruđ n Tiřit u řeeruđ n Tubbuřeřya

¹ Tiřit tebna taddart nnes,
teggá tessuyda ipilaren nnes, *aqá-ten di* sebea.

² Nettat tyarř i řmar nnes, txeğeđ binu nnes.
Eawed tessu řřabřa nnes.

³ Nettat tessekk timsexxarin nnes.

X tsawin yueřan qæ n řeğeudi n tendint tetrřaya:

⁴ “Wenni d aqubbani war issinen, ejj it ad dd-yas danita!”
Nettat teqqar i yenni war řar iği ca wuř imten:

⁵ “Asem-dd, ccem zeg weyřum inu
u swem zi binu nni d awem dd-xeğdey.

⁶ Jjem taqubbanect u ddarem
u đfarem abrid n řefhamet.”

⁷ “Wenni ittwebbxen amestehziy, issarebbu řefđiřet i yixef nnes
u wenni ittæaqaben æeffan, aqa *netta yarebbu* abeqqiđ n řefđiřet nnes.

⁸ War ttēyyab amestehziy ħima netta war cek icarreh, eeyyeb miyis, xenni netta ad cek ix̄s.

⁹ Ewc i umiḡis, *xenni* ggur ad idweř d miyis ktar, s̄yar tussna i umsegged, *xenni* netta ad ifhem ktar.”

¹⁰ Tiggg^wudi n SIDI d beddu n tiyit u tussna n Umqedd̄as d beddu n řefhamet.

¹¹ Maḡar zzayi ad ktaren wussan nnek, isegg^wusa n tudart ad ttwarnin i cek.

¹² Mařa cek d miyis, *xenni* ad tiřid d miyis i yixef nnek u mařa testehezzid, ad tarbud aya simant nnek.

¹³ Tamyart Tabuhařect tēttbuhřuy, *nett̄at* d taqubbanit u war tess̄en walu.

¹⁴ Nettat tēttḡima ḡar tewwart n taddart nnes, x ijj n kursi, x řeḡudi n tendint

¹⁵ ħima ad třaya x inni iēddun, inni igguren nican imesraq nsen, *tenna*:

¹⁶ Man wen *iřan* d aqubbani? Ejj it ad imeyyeř danita u i yenni ḡarsen uř imten, teqqar nettat:

¹⁷ “Aman i ittwacaren d imiziden, u aḡrum innuffaren aqa icna.”

¹⁸ Netta war issin aqa din řexyařat, aqa inewjiwen nnes deg waḡay n řaxart *i iřan*.

10¹ Awařen iweznen n Suliman

Ijj n mmis d amiḡis issfarař ħabas, *maca* ijj n mmis abuhaři d acđan n yemmas.

² Tixubay n tuēeffna war nneffēent, *maca* tasegda tēttwafekk-dd zi řmewt.

³ SIDI war ittejj̄i řēsmar n imseḡgaden ad iḡeyyef, *maca* mezri n iēffanen iēarren it ḡar řagg^waj.

⁴ Wi ixeddmen s ufus yarxun, ittawi-dd zzeřđ, *maca* afus n yenni ittceřaren ittawi-dd aḡřa.

⁵ Wenni iyarrwen deg unebdu, d ijj n mmis ifehhmen, *maca* wenni itteřřen di tmeyra, d ijj n mmis n řefđiřet.

⁶ Lbarakat aressant x uzeḡif n imseḡgaden, *maca* leunf issdurr̄uy aqem̄mum n iēffanen.

⁷ Řidaret i umseḡged *ad dd-yawi* lbaraka, *maca* isem n iēffanen ggur ad yarřuđ.

⁸ Wenni d amiḡis deg wuř, ad iqbeř tiweřša, *maca* wenni *issawařen am* ijj n ubuħaři s iyencicen nnes, ad iwđa.

⁹ Wenni igguren s teřdiqt, iggur di řaman, *maca* wenni *igguren* ibriden ifar̄yen, ad ittwassen.

¹⁰ Wenni ittyemmazen s tiřřawin, ittegḡen řeřriq, uca wenni ittegḡen tubbuheřya s iyencicen nnes, ad iwđa.

- ¹¹ Aqemmum n umsegged d taṛa n tudart,
maca leunf issdurray aqemmum n ieffanen.
- ¹² Acrah tessekkara-dd imcubbecen,
maca tayri tessdurra marra ixetṭan.
- ¹³ X iyencicen n wenni yar iḡa řefhamet tettwaf tiyit,
maca akeccuḍ i wenni war yar iḡi bu wuř imten.
- ¹⁴ Imiyisen txemmaren tussna,
maca aqemmum n ubuhaři ittades yar uhellek.
- ¹⁵ I bu-waḡra min iḡan nnes d tandint ijehden nnes,
zzřed n umezřuḍ d ahellek nnes.
- ¹⁶ Řyigēt n umsegged aqa-tt ař tudart,
řmunet n ueffan ař ddenb.
- ¹⁷ Wenni iheṭṭan tarbiyyet *aqat x* webrid n tudart,
maca wenni isemmřen deg uwebbex, ggur ad iwedddar.
- ¹⁸ Wi itteffaren acrahi řares iyencicen sşarriqen,
u wi ittceqqfen aqa t d abuhaři.
- ¹⁹ Yar waṭṭas n wawařen war iqqim uxeṭṭu ineqqes,
maca wenni imenneen iyencicen nnes, aqa *ittegg* s řeeqeř.
- ²⁰ Nnuqart iqquren d iřes n umsegged,
uř n n ieffanen war isekk^win.
- ²¹ Iyencicen n imseggaden sseccan aṭṭas,
maca ibuhařiyyen mmuten umi war řarsen bu wuř imten.
- ²² Lbaraka n SIDI tettawi-dd aḡra
u arber *n bnadem* war dayes yarenni walu.
- ²³ I ubuhaři tameggit n řefđihet am ijj n řuraret,
maca i weryaz n řefhamet *adebbar* s tiyit.
- ²⁴ Min zi ittegg^wed ueffan, ad t iřqef,
maca asitem n imseggaden ad ittwammewc.
- ²⁵ Mařa teėdu řarıyat, ad yiři ueffan iweddar,
maca amsegged ibedd imten i řebda.
- ²⁶ Am binu asemmam i teymas d ddexxan i tiṭṭawin,
ammu i igga umeėguz i yenni t issekken.
- ²⁷ Tigg^wudi n SIDI tarenni deg ussan *i tudart*,
maca isegg^wusa n ieffanen ttwassquḍden.
- ²⁸ Tarajit n imseggaden d řefrařet,
maca asitem n ieffanen ggur ad ifna.
- ²⁹ Abrid n SIDI d ijj n lburj *ijehden* i wenni d ařdiq,
maca d ahellek i yenni ittegggen řyecc.
- ³⁰ Amsegged eemmarş ad inhez z i řebda,
maca ieffanen war ggur ad qqimen zeddyen di temmurt.
- ³¹ Aqemmum n umsegged ittawi-dd tiyit s waṭṭas,
maca ijj n yiřes iemmar s řexdaeat ad ittwaqess.
- ³² Iyencicen n umsegged ssnen min yarıdan,
maca aqemmum n ueffan *issen* řexdaeat waha.

- 11¹ Ğmizan ayeccac d nnei i SIDI,
maca azru n řewzen nican ittaf řxađar nnes.
- ² Mařa tusa-dd nnfaxet, tusa-dd uřa d řefđihet,
maca řar imwađeen *teđa* tiyit.
- ³ Tařđiqť n iřđiqen tneddeh iten,
maca tařraymect n iyeddaren taředdeğ iten.
- ⁴ Agřa war ineffe řar wass n wesxeđ,
maca tasegda tessenjam zi řmewť.
- ⁵ Tasegda n wenni asdiq itarra abrid nnes nican,
maca aeffan iweťta s tuoeffna nnes.
- ⁶ Tasegda n iřđiqen ad ten tessenjem,
maca iyeddaren ad ttwacarfen deg umezri nsen.
- ⁷ Mařa immut bnadem aeffan, ifna usitem nnes,
uřa d tarajit n *yeryazen* iyeccen ad tefna.
- ⁸ Amsegged ad dd-ittwafekk zi řehsaret
u aeffan ad dd-yas deg wemcan nnes.
- ⁹ Lmunafiq ittekk-dd řekhęđ s umqarreb nnes s uqemmum nnes,
maca imseggaden ad ttwafekken s tussna nsen.
- ¹⁰ Tandint tettesřiwřiw mařa imseggaden aqa-ten mliř
u mařa ttwahellken ieffanen, aqa din asřiwřew.
- ¹¹ Ict n tendint tettwassgaeeed s lbaraka n iřđiqen,
maca zeg uqemmum n ueffan ad tettwahdem.
- ¹² Wenni war řar iği ca wuř imten, isseřqara amqarreb nnes,
maca aryaz wenni řar iğa řefhamet ittesqar.
- ¹³ Wenni igguren da d diha s texbarjit, ittęarra min innuffaren,
maca wenni *i di iğa* arruř ařđiq, aqa issnuffara tamesřact.
- ¹⁴ Mařa war din adebbar, iweťta řgens,
maca ad yiři usenjem s řemyaret n umcawar.
- ¹⁵ Wenni idemmnen řbarrani, war d as tteffey ca mliř,
maca wenni icarrhen inni itteggen ticti x ufus *iyij n ubařřani*, aqa-t di řaman.
- ¹⁶ Tamřart tettaf řxađar teťtef di řeezz
u ayt-leunf teťfen deg wagřa.
- ¹⁷ Bnadem s tmexsiwt icewwaren ittegg řxar i řeemar nnes,
maca wenni itteggen s řexcunet deg weysum nnes, aqa netta d aqessař.
- ¹⁸ Aeffan imejjar řyiğet n řyecc,
maca wenni izarreen tasegda, *imejjar* ict n řmunet imetnen.
- ¹⁹ Tasegda nican *tettawi řar* tudart,
wenni yareddfen řřar, *yarezzu* řmewť.
- ²⁰ Inni řarsen uř ifaryen aqa-ten d nnei i SIDI,
maca inni igguren abrid *nsen* nican netta yareťta daysen.
- ²¹ S tidett, aeffan war ittyimi nebřa řexřas,
maca tarwa n imseggaden ad ttwassnejmen.
- ²² Ict n txadent n wurey di tinzar n yiřef,
ammu teđa ict n temřart tecna nbřa ameyyez.
- ²³ Amezri n imseggaden myir d min iřebřen,
maca asitem n ieffanen aqa sennej i řtarf.
- ²⁴ Aqa din wenni ibeťtan s wecrim, *maca* ittwarni as ead ktar

u aqa din ijjen wenni imenneen *ktar* x min icuwwaren,
waxxa amenni ineddeḥ ɣar zzerd.

²⁵ Reemar nni ittbarken ad ittwassyiwen

u wenni itticcen aman, ggur ad as immewc waman simant nnes.

²⁶ Wenni itt xemmařen imendi, ineeēē it řgens,

maca lbaraka ad tiři x uzeğif n wenni iznuzan *imendi*.

²⁷ Wenni icetřaren di třweē n min iřebřen, yarezzu min yarıdan,

maca wenni ittřaman řyar, ad t iřqef.

²⁸ Wenni ittcařen x wagřa nnes, ad iwđa,

maca imseggaden ad ssneenen tıfray tizeyzawin.

²⁹ Wenni ihekkwřen taddart nnes, ad iwart asemmiđ

u abuhaři *ad yiri* d amsexar n wenni di iđa wuř amiyiş,

³⁰ řyiğēt n imseggaden d ict n tcejjart n tudart

u wenni yarebbřen řēmur aqa d amiyiş.

³¹ Xzar, aqa ad itt waxeğeş umsegged di temmurt,

xenni mahu aeffan d umednub.

12¹ Wenni itt xsen tarbiyyet, itt x tussna,
maca wenni icarrhen awebbex aqa netta d aqeffuḥ.

² Bnadem ařebřan ittař řxadar n SIDI,

maca aryaz inekwan tařřaymect ggur ad t ibarreḥ d bu-umarwas.

³ Bnadem war izemmar ad iqqim ibedd umi ittegg řyar,

maca azwar n imseggaden war izemmar ad inhezz.

⁴ Tamyart imeḥđen d ttaj n weryaz nnes,

maca tenni t yarrin ittseđřa, *d tenni* am wareşşuđ deg ixsan nnes.

⁵ Ixemmimen n imseggaden d řheqq,

maca adebbar n ieffanen d řyecc *marra*.

⁶ Awařen n ieffanen řebten deg idammen,

maca aqemmum n yenni igguren nican ggur ad ten issenjem.

⁷ Ieffanen ttneqřaben u war řin ead,

maca taddart n imseggaden ggur ad teqqim.

⁸ Bnadem itt wacekkar elašab řeqyas n řēqeř nnes,

maca wenni di iđa wuř ifaryen, ad itt wasseḥqar.

⁹ Iḥřa wenni iḥessben ixef nnes d amehđaj *maca ead* řares ijj n uxeddām,

x wenni itt cenneen ixef nnes *maca* war řares bu weyrum.

¹⁰ Amsegged issen řēmar n řebhimet nnes,

maca arreḥmat n ueffan qeşent.

¹¹ Wenni icarrzen tammurt nnes, ad ijjawen s weyrum,

maca wenni yareddfen ayt farq-cyeř, war řares ca wuř imten.

¹² Aeffan itt x *min iğan di* traccia n yenni itteggēn řyar,

maca azwar n imseggaden itt yima itt icc *řyiğēt*.

¹³ Deg uxeřtu n iyencicen *dayes* ijj n řfex d aeffan,

maca amsegged ggur ad iffe y zi řeḥşaret.

¹⁴ Zi řyiğēt n uqemmum *nnes* itt wasyiwen kuř ijj s řxir

u min dd-ttawyen ifassen n bnadem, ad řares dd-idweř.

¹⁵ Abrid n ubuhaři nican di tiġtawin nnes,
maca wenni ittesřan i ccwar, aqa netta d miyis.

¹⁶ Abuhaři isscana deg wass d ijj řhem nnes,
maca wenni ifetnen, iddařa řeřya nnes.

¹⁷ Wenni dd-inetřqen tidett, isscana tasegda,
maca acehhad n żzur *isscana* acmat.

¹⁸ Aqa din wenni ittharwađen am tejjut n ssif,
maca iřes n imiyisen ittawi-dd agenfu.

¹⁹ Bu-wuř *iccuren s* tidett ad ittwassemten i řebda,
maca iřes issxarriqen *myir* i yijj n umur waha.

²⁰ Acmat aqa-t deg wuř n yenni inekkwan tuęeffna,
maca i yenni inessřen řehna, *aqa din* řefrařet.

²¹ Amseggad war t iřeqqef řęecc,
maca ięeffanen ggur ad ttwaccuren s řęar.

²² Iyencicen isxarriqen d nnei i SIDI,
maca inni ittemřurrufen s řaman yarđa as.

²³ Bnadem ifetnen itthawařen issdurri tussna nnes,
maca uř n ibuhařiyen isyuyyu tubbuheřya řar řexřa.

²⁴ Afus n wenni ttceřřaren/imeřden ad iřkem,
maca řeęgez ineddeh řar tesmuęi.

²⁵ Amnus deg wuř n bnadem isshekkwa t,
maca awař iřebřen issfarrař it.

²⁶ Amseggad isbeř ařtas x umqarreb nnes,
maca abrid n uęeffan yarra iten ad weddaren.

²⁷ Ayeccac war ięeffar ca aneymar nnes.
maca agřa n iwdan iřřan aqa d amřađ.

²⁸ Deg umesruq n tsegda *teřa* tudart,
u abrid n řatar nnes war dayes bu řmewt.

13 ¹ Ijj n umiyis n mmis *aqa t d řřifet n* uwebbex n babas,
maca amestehziy war ittesři řar utextix.

² Zi řęięet n wawařen n kuř ijj ad yecc řxar,
maca řeęmar n ięeddaren *ad yecc* leunf.

³ Wenni ittessaren aqemmun nnes, iřetta řeęmar nnes,
maca wenni yarezzmen iyencicen nnes ařtas, *aya ad* as *yiiř d* ahellek.

⁴ Řeęmar n umeęuz yarřef, *maca* war din walu,
maca řeęmar n inni ittceřřaren ad ittwassyiwen.

⁵ Awařen n ixarriqen icarreh iten umseggad,
maca aęeffan issarzag ixef nnes u issfetřař *innedni*.

⁶ Tasegda třeřta wenni igguren abrid *nnes* nican,
maca tuęeffna n umednub ggur ad t isshekk.

⁷ Aqa din inni ittarran ixef nsen d bu-wağřa *maca* war yarsen walu
u aqa din inni ittarran ixef nsen d imezřađ, *maca* řarsen ařtas.

⁸ Ddeyyet i řeęmar n ca n yijjen d agřa nnes,
maca amezřuđ war ittesři ca i uhuddi.

⁹ Tafawt n imseggaden ggur ad tary s řefrahet,
maca řefnar n ieffanen ad iksi.

¹⁰ Zi tnefssect ittas-dd myir amenyi,
maca inni ikessin acawar, řares tiyit.

¹¹ Agřa n deyya, ad yiři drus,
maca wenni iyarrwen s ufus, ggur ad yarbeh.

¹² Řayas yuyřen isseięa uř,
maca twarrit n mezri iccuren, aqa d tacejjart n tudart.

¹³ Wenni isseřqaran awař, ad zzayes ittwaqqen,
maca wenni ittegg^weden tawřiyet, ggur ad ittwaęeęę.

¹⁴ Tayuri n umiyis d řeunřar n tudart,
mařend ad yařweř i řefxux n řmewt.

¹⁵ Řeęqeř iřebřen ittawi-dd řxađar,
maca abrid n ięeddaren aqa iqseř ařtas.

¹⁶ Kuř ijjen wenni ifetnen, ixeddem s tussna,
maca abuhaři ittbezzæ tayyuři.

¹⁷ Amsexxar æeffan iweřta di řęar,
maca amsexxar ařdiq *ittawi-dd* agenfu.

¹⁸ Zzeřđ d řefđihet aqa-ten i wenni yugin awebbex,
maca wenni iheřtan awebbex, ggur ad ittwaęeqqar.

¹⁹ Ijj n usitem iccuren d miziđ i řeęmar,
maca i ibuhařiyyen d nnei mařend ad heyyden x řęar.

²⁰ Wenni igguren ak-d imiyisen, ad idweř d mięis,
maca wenni itteřsurrufen ak-d ibuhařiyyen ad t iřqef ddeę.

²¹ Řęar ad iđfar imednab,
maca amsegged ggur ad t xeęden s řxar.

²² Wenni iřebřen ittejja i wayyawen nnes tařyart,
maca agřa n ayt-ddnub ittwaęemmeř i umsegged.

²³ Iyyar n imezřađ ittawi-dd macca s wařtas,
maca aqa din inni ittawahellken řami *din* anqas n řheqq.

²⁴ Wenni imennæn æemud nnes, icarh mmis,
maca wenni t ittexsen, ittekkar akides ittwebbex it di řweqt.

²⁵ Amsegged ad icc ař i řa ijjawem řeęmar nnes,
maca æeđdis n ieffanen ad iqqim itteřwaja *řebda*.

14¹ Tiyit n temyarin tbenna taddart nnes,
maca tubbuheřya theđdem itt s ifassen nnes.

² Wenni igguren di teřdiqt nnes, ittegg^wed SIDI,
maca wenni itteffęen zeg ibriden nnes, isseřqara it.

³ Deg uqemmmum n ubuhaři *din* řmeceęd n nnfaxet,
maca iyencicen n imiyisen heřtan ten.

⁴ Mani war řin ifunasen, ittyima řmedwed iřfa,
maca s jjeđd n ufunas aqa din řřabet temyar.

⁵ Acehhad d tidett war issxarriq ca,

maca acehhad s ʒzur ittʃuḍ ixarriqen.

⁶ I amestehziy war din tiḡit xmi tt yarezzu,
maca i ufehham ihwen *xas mahend ad yaf* tussna.

⁷ Agg^wej x weryaz abuhaři,
maɣar cek war *yares* tettifed ca iyencicen i iccuren s tussna.

⁸ Tiḡit n wenni ifetnen aqa-tt d řefhamet n webrid *n yixef* nnes,
maca tubbuheřya n ibuhařiyyen d acmat.

⁹ Ibuhařiyyen stehzan s *wedař* n umarwas,
maca jar iřdiqen ittwař řxaḍar.

¹⁰ Uř issen tarzugi nnes
u řbarrani war izemmar ad yaca s řefrahet nnes.

¹¹ Taddart n ieffanen ad tettwareddeğ,
maca taqıdunt n iřdiqen ad tnewwar.

¹² I wenni umi ittban abrid iseggem,
maca aneggar nnes *myir* ibriden *ittawyen* ɣar řmewt.

¹³ Waxxa ɣar weḍħac uř ittegg řehriq
u aneggaru n řefrahet tettakkwaḍ-dd acḍan.

¹⁴ Wenni ɣar iğa wuř d aęeddar, ggur ad ittwassyiwen s ibriden nnes,
maca aryaz ařebħan s yixef nnes.

¹⁵ Wenni iğan d aqubbani, ittamen di kuř awař,
maca wenni ifetnen iħetta așurif nnes.

¹⁶ Miɣis ittegg^wed u ittħeyyad x řɣar,
maca abuhaři iseęear u ittyiř as aqa-t di řaman.

¹⁷ Wenni ittxeyyaqen deɣya, ad igg tubbuheřya
u aryaz inekkwat taħřaymect, ad ittwacarħ.

¹⁸ Iqubbaniyyen ad warten tubbuheřya,
maca inni ifettnen, ad ten tewwjen s tussna.

¹⁹ Ieffanen ttaḍaren zzat i wudem n iřebħanen
u ieffanen zzat i tewwura n imseggaden.

²⁰ Amezřuḍ icarreh it umeddukkeř nnes,
maca ațtas d inni ittessen ayt n bu-wağřa.

²¹ Wenni isseħqaran amqarreb nnes, itegg ddnub,
maca sseed n wenni ittħinnan x imwaḍeen.

²² Inni dd-ixeğqen řɣar, ma war ttweddarin nitni?
Tamexsiwt icewwaren d řaman aqa ɣar yenni ittxarrařen di min iřebħen.

²³ Di marra řweħřan n warbar dayes řefḍeř,
maca řħarḍ n iyencicen ineddeħ ɣar weħwaj waha.

²⁴ Ttaj n imiyisen d ağřa nsen,
tubbuheřya n ibuhařiyyen d tubbuheřya *waha*.

²⁵ Acehhad așdiq issenjam řeemur,
maca wenni yarexxun i ixarriqen, icemmet.

²⁶ Di tigg^wudi n SIDI *dayes* ttıqet ijehden
u netta ad yiři d adurri i iħenjiren nnes.

²⁷ Tigg^wudi n SIDI d řeunșar n tudart
i usenjem zeg iceddiyen n řmewt.

- ²⁸ Deg waṭṭas n řgens *ixemmeř* ucewwar n ujeřid,
maca di drus n řgens *ixemmeř* uhellek n řhakem.
- ²⁹ Wenni i řar ięa ttasie n řxađar řares řefhamet temřar,
maca wenni i di ięa buřbeř iřsaren issekkar tubbuheřya.
- ³⁰ Uř iřehřen aqa d tudart i arrimet,
maca tusmi d areřsud i yexsan.
- ³¹ Wenni iheřřaren amehđaj, issehřara wenni t idd-ixeřqen,
maca wenni itthinnan x umezřud, ittcennee it.
- ³² Aeeffan ittazzeř x ixef nnes s řřar nnes i itegg,
maca amseggad ittyima ittceř *ead* di řmewt nnes.
- ³³ Tiyit tarsi deg wuř n ifehhamen,
maca min ięan daxef deg ibuřariyyen ggur ad ittwassnen.
- ³⁴ Tasegda tesseuęa řgens,
maca řeđihet n wayđuden d ddnub.
- ³⁵ Řxađar n ujeřid yarsa x umsexar ifehhmen
maca wenni zzayes issfetřahen iřeqqef it wesxed nnes.

- 15**¹ Ict n twarrit tefsus tessesmađ ascar,
maca ijj n wawař itteqsen issekkara afugem.
- ² Iřes n imiřisen ijebbed tussna řar zzat,
maca aqemum n ibuřariyyen ittazzeř s tubbuheřya.
- ³ Tiřřawin n SIDI di kuř amcan,
 ttħekkarent i iřebħanen d ieeffanen.
- ⁴ Iřes nni issgenfan d tacejjart n tudart,
maca arhaj nnes ittarezza buřbeř.
- ⁵ Abuhaři ad inđar awebbex n babas,
maca wenni itthekkaran i uwebbex, aqa iften.
- ⁶ Di taddart n imseggaden din řkenz imřar,
maca di min dd-ittawi ueeffan dayes tamara.
- ⁷ Iyencicen n imiřisen ssuyusen tussna,
maca war ięi amenni uř n ibuřariyyen.
- ⁸ Tayařst n ieeffanen d nnei i SIDI,
maca tazaęit n iřdiqen aqa-tt i netta d arđa.
- ⁹ Abrid n ueeffan d nnei i SIDI,
maca wenni ideffaran tasegda, ittexs it netta.
- ¹⁰ *Aqa din* tarbiyyet iqeřřen i wenni isemřen deg webrid,
 u wenni icarrhen awebbex, ggur ad immet.
- ¹¹ Řaxart d tesraft *iccuren s* wareddeę *nurezment din* zzat i SIDI,
 mečarř ead d uřawen n iřenjiren n iwdan?
- ¹² Amestehziy war ittexs wenni t i řa iwebbexen,
 war ittriř ca netta řar imiřisen.
- ¹³ Uř ifarřen ittegg aęembub innđeřqen,
maca amnus deg wuř issecđan/iqenden buřbeř.
- ¹⁴ Uř ifehhmen yarezzu tussna,
maca aqemum n ibuřariyyen issecca ixef nnes s tubbuheřya.

- ¹⁵ I yenni ittwaḥṣaren marra ussan nsen ieffanen,
maca uř ifarḥen *am* ijj n macca břa qeřtu.
- ¹⁶ Iḥřa drus ak-d teggwudi n SIDI
 x ijj n řkenz d ameqqran s tamara.
- ¹⁷ Iḥřa ijj n řęęęs s řxuđar mani teęa tayri
 x ijj n uyenduz iđđan s wecrah.
- ¹⁸ Aryaz nni ittxeyyaqen deęya issekkara imenyiyyen,
maca wenni ęar ięa ttasie n řxuđar issexşay amenyi.
- ¹⁹ Abrid n umeeguz am ijj n cbarq n isennanen,
maca amesruq n iřdiqen iwata.
- ²⁰ Mmis amiyis ad issfarḥ babas,
maca bñadem abuhaři isseḥqara yemmas.
- ²¹ Tubbuheřya aqa-tt d řefraḥet i wenni war ęar ięi bu wuř imten,
maca ijj n weryaz n řefhamet iggur nican.
- ²² Inwayen feccřen mařa war din ięi ccwar,
maca s wařtas n imcawaren ggur ad imsar.
- ²³ Aryaz ęares řefraḥet di twarrit iřebḥen zeg uqemmum nnes
 u meĥař iřbeḥ wawař di řweqt nnes.
- ²⁴ Abrid n tudart ęar sennej i ufehham,
 maḥend netta ad iḥeyyed x řaxart swadday.
- ²⁵ Taddart n bu-nnfaxet ad tt iqřee SIDI,
maca aymir *n yeyyar* n tajaĥ issemtan it netta.
- ²⁶ Ixemmimen n ueffan d nnei i SIDI,
maca awařen icewwaren d imezdagen.
- ²⁷ Wenni yemmaren ęar arbeḥ iyeřteř taddart nnes di arrziyyet,
maca weni icarrhen tarzifin, ad iddar.
- ²⁸ Uř n imseggaden ittarraş maḥend ad dd-yarr,
maca aqemmum n ieffanen ittfeyyeđ s *eřam kuř* řęar.
- ²⁹ Iggwej SIDI x ieffanen,
maca taęaęit n imseggaden ittesřa as.
- ³⁰ Tafawt *di* tiřřawin issfarreḥ uř,
 řexbar ařebḥan issyuma ixsan.
- ³¹ Amezzuy ittesřan ęar uwebbex,
 ad issens di řwest n imiyisen.
- ³² Wenni ineřřaren tarbiyyet, isseḥqara ixef nnes,
maca wenni ittesřan ęar uwebbex, issyawan uř *nnes*.
- ³³ Tiggwudi n SIDI d awebbex ęar tiyit
 u awađee ittizwar i ccan.

16¹ Bñadem ęares ixarriřen deg wuř *nnes*,
maca tamwarrit n yiřes *tettas-dd* zi SIDI.

² Marra ibriden n weryaz řfan di tiřřawin nnes,
maca SIDI ittqeęab buḥbeřat.

³ Sars řexdayem nnek i SIDI,
 uca ixemmimen nnek ggur ad ttwassmetnen.

- ⁴ SIDI ixreq-dd marra di t̄tweε n yixef nnes, ead ūra d aεeffan *igga it* i wass n řyar.
- ⁵ Kuř amεeffar d nnei i SIDI, afus xas, netta war ggur ad ittetwabarri *emmarř*.
- ⁶ S tmexsiwt icewwaren d řaman ad ittwařdi řyεcc u s tigg^wudi n SIDI itt̄eyyad weryaz x řyar.
- ⁷ Mařa usin-dd ibriden n ijj n weryaz x řxařar n SIDI, ggur ad yarr ūra d řeedyan nnes ad kides ggen řehna.
- ⁸ Iħra drus ak-d tsegda x wařtas n řyĩęet b̄ra řħeqq.
- ⁹ Uř n bnađem ittxarřε abrid nnes, *maca* SIDI ineddeh iřuraf nnes.
- ¹⁰ Řħukm b̄ra adwař x iyencicen n ujeęid, aqemmmum nnes war ixet̄ti deg weħkam.
- ¹¹ Řmizan *nican* d t̄tawyat n řmizan nican aqa-ten n SIDI, marra izra n řewzen di tēcyard d řxedmet nnes.
- ¹² D nnei i ijeęiden xmi i ya ggen řyar, mařar řkursi igellden ittwassemten zi tsegda.
- ¹³ Iyencicen *i iccuren* s tsegda tteęjiben i ujeęid u wenni issawařen nican, ittexas it netta.
- ¹⁴ Asear n ujeęid *am* lmalakat n řmewt, *maca* aryz amiȳis izemmar ad t isseřha.
- ¹⁵ Di tfawt n uyembub *ittissięen* n ujeęid *teęa* tudart u řxařar nnes am useynu n wenzar di tefsut.
- ¹⁶ Tarezzut n tiyt teħřa x wureȳ ittissięen, tarezzut n řefhamet teđu nnuqart.
- ¹⁷ Aħeyyed x řyar d abrid issgaεεaden n iřdięen. Wenni iħet̄tan abrid nnes, iħet̄ta tudart nnes.
- ¹⁸ Tanefsect tettizwar-dd i arzȳiyyet u nnfaxet tettas-dd qbeř i uweřtu.
- ¹⁹ Iħřa aqnaε n buħbeř ak-d imwađeen x ubet̄tu n tkeccađt ak-d ayt-nnfxat.
- ²⁰ Wenni ittxarrařen mliħ di ca n tmesřact, ad yaf řxar u sseed n wenni ittcařan x SIDI.
- ²¹ Wenni řar ięa wuř d miȳis, ad t semman bu-weftan u tazyudi *n řħarđ* n iyencicen tarenni di řefhamet.
- ²² Řeeqerđ d řeunřar n tudart i bab nnes, maca tarbiyyet i ibuħařiyyen d tubbuħeřya *waha*.
- ²³ Uř n umiȳis ittarra aqemmmum nnes ifehhem u zeg iyencicen nnes ad fehmen ktar.
- ²⁴ Awařen icewwaren *ggin am* tamment n teȳrast, aqa-ten d imiziden i řeεmar d uęenfu i yexsan.
- ²⁵ Ittemsar aqa ijjen ittyiř as abrid nnes nican, *maca* aneggar nnes *myir* ibriden *ittawyen* řar řmewt.
- ²⁶ Řaz n ucewwar ixeddem as i netta, mařar aqemmmum nnes ineddeh it.

- ²⁷ Aryaz i war isekk^win iyezza řyar
u x iyencicen nnes amecnaw ict n tmessi iccaten ammu d wammu.
- ²⁸ Aryaz *iccuren* s řexdaæat issekkara amenyi
u axbarji ittawi-dd *ead* abeřtu ak-d umeddukkeř iřebħen ařtas.
- ²⁹ Aryaz bu-ļeunf ittýarra amqarreb nnes,
ineddeh it ýar ijj n webrid war iĝin mliħ.
- ³⁰ Netta itteqqen titřawin nnes maħend ad ixarreř marra ddarbat n řexdaæet,
ittkemmeç iyencicen nnes, *am* ittegg řyar.
- ³¹ Acewwaf icaben d ict n temrist izewwqen,
tzemmed ad tt tafed x webrid n tsegda.
- ³² Iħra bu-ttasie n řxađar x ijj n weryax ijehden
u wenni ittebħten buħbeř nnes *iħra* x wenni itteřfen ict n tendint.
- ³³ Taqedduħt temmeđar deg weħsin,
maca array ittass-dd zi SIDI.

- 17**¹ Iħra ijj n uzeæcif n weyrum yuzyen ak-d řehna
x ict n taddart teccur s țyarřa, dayes amenyi.
- ² Ijj n yismey ifetnen ad idebbar x ijj n mmis nni ittawyen ýar řefdiħet,
u di řwest n yaytmas ggur ad ibđa netta řwart.
- ³ Ařenjir n usefsi i nnuqart u afarran i wurey,
maca SIDI ittjarrab uřawen.
- ⁴ Aæeffan ixezzar ýar iyencicen iæeffanen,
bu-ixarriqen itticc amezzuý i yiřes iccuren s řyecc.
- ⁵ Wenni ittħeccen x umezřuđ, issfeřteħ wenni t-i-dd-ixeřqen,
wenni ifarrħen x arzeyyet, war ittwiħsib d amezdag.
- ⁶ Ttaj n iwessura d ayyawen
u talwizt n iħenjiren d ibabaten nsen.
- ⁷ Ayencic n ccan war dd-ittis ak-d ubuħaři,
u æssak ead ayencic issxarriqen ak-d umcenneæ.
- ⁸ Tarzeft n arrecwet d ijj n wezru izewwqen di titřawin n bab nnes,
mani mma yarra s uzeĝif, itteřiħ.
- ⁹ Wenni issdurruyen axeřtu, yarezzu tayri,
maca wenni ittæawaden ict n řħajet zi jdid, ibeřta imeddukař icnan.
- ¹⁰ Atextex ittqarra ařtas x ufehham,
x ijj n ubuħaři s mya n teyyita.
- ¹¹ Amyewwey yarezzu myřir x řyar,
maca amsexxar iqseħ ad dd-ittwasekk đidd nnes.
- ¹² Ejj ad immeřqa ijjen ak-d ca n ddub umi ttwacaren tarwa,
maca war iĝi abuħaři di tubbuħeřya nnes.
- ¹³ Wenni ittxeĝasen min iřebħen s řyar,
war tettheyyid arzeyyet x taddart nnes.
- ¹⁴ Beddu n umenyi *amecnaw* arzam n řħemřet n waman.
Ejj amenyi ad yars, qbeř i ýa idduqgez.
- ¹⁵ Wenni ittbarrañ aæffan u ittbarraħ aqa amsegged d aæffan,
d man aya d nnei i SIDI, *wah* am win am wa.

¹⁶ Mayemmi din i ɣa iřint tmenyat deg ufus n ubuhaři maħend ad iseɣ tiyit,
am war ɣares netta uř *i man aya*?

¹⁷ Ameddukker ittexs řebda
u tawmat tettwaxřeq-dd i řeřşaret.

¹⁸ Bnadem nni war ɣar iđi uř imten, iccat fus,
ittegg ixef nnes d arhan i umqarreb nnes.

¹⁹ Wenni ittexsen axetřu, netta ittexs amcubbec,
wenni ittegggen tawwart nnes tgaεeed, yarezzu tarezzit.

²⁰ Wenni ɣar iđa uř ifarɣ, war ittif min iřebħen
u wenni ifarřen s iyencicen nnes, ad iwđa di arzeyyet.

²¹ Wenni dd-yurwen abuhaři, *ittawi-dd* acđan i yixef nnes
u babas n ijj n ubuhari war izemmar ad ifarħ.

²² Uř ifarħen ijebbed agenfu,
maca buħbeř iceđnen issazay ixsan.

²³ Aεeffan ad dd-iksi tarzeft n arrecwet zeg weħsin,
ħima ad issfary imesraq n řħeqq.

²⁴ Afehham *ittegg* tiyit ztat i tmuyři nnes,
maca tiřřawin n ubuhaři *ttawyent* ař řřarf n temmurt.

²⁵ Ijj n mmis abuhaři d řeedab i babas
u řeħřiq amarzag i wenni t-idd yurwen.

²⁶ Uřa d aweddeb n umsegged war iđi nican,
niy aqa ayt n řřasiřet ad ccen aεmud di ssibbet n teřđiqt *nšen*.

²⁷ Wenni ɣar teđa tussna, imenneε awařen nnes
u aryaz afehham *dayes* buħbeř nnes yarsa.

²⁸ Uřa abuhaři issyaden, ggur ad ittwaħseb d miyis
u wenni ibelleen iyencicen nnes *ad ittwaħseb* d afettan.

18¹ Wenni iεezźřen ixef nnes, yarezzu x mezri nnes,
netta idduqquz x marra min izemmaren ad yiři d adebbar.

² Abuhaři war d as tetteejib řefhamet,
itteejib as mřir aseurri n wuř nnes.

³ Mařa yusa-dd uεeffan, ittas-dd uřa d aseħqar
u ak-d řefđiħet ittas-dd řεar.

⁴ Awařen zeg uqemmum n weryaz *am* waman yuđyen,
řεunřar n tiyit *am* ict n teyzart ittazźřen.

⁵ War iđi ca mliħ ad tessεizzed aεeffan,
maħend ad ttawyed amsegged ɣar ccræ ad xas tħekmed.

⁶ Iyencicen n ubuhaři neddhen t ɣar umenři
u aqemmum nnes ittřaya-dd i weεmud.

⁷ Aqemmum n ubuhaři d ahellek nnes
u iyencicen nnes d řfex n řεεmar nnes.

⁸ Awařen n ixbarjiyyen am ħalawit
u hekkwan deg ixammen n daxeř n uεeddis.

⁹ Wenni iđan d amarxu di řxedmet nnes,
d ict n tewmat n bab n uředdeđ ameqqran.

¹⁰ Isem n SIDI d ijj n lburj imten,
amsegged ittazzeŕ Ƨar dinni uca ittwassakkwađ ař sennej di řaman.

¹¹ Agřa n bu-wagřa d tandint nnes ijehden,
u *nettat* am ijj n řhid yueřan qaē di řbař nnes.

¹² Qbeř ma ggur ad ittwarž, ittgæēad wuř n bnađem,
maca amwađeē ittizwař as i ccan.

¹³ Wenni dd-ittarran awař qbeř i Ƨa iseř,
d man aya d tubbuheřya d řefdihet i netta.

¹⁴ Buħbeř n weryaz ittšenedd it Ƨar řehřac nnes,
maca buħbeř ittwaržen, wi izemmaren ad t iksi?

¹⁵ Uř n ufehham yarezzu tussna
u amezzuƧ n umiƧis yarezzu tussna.

¹⁶ Tarzef t n bnađem tarezzem as tiwwura
u tneddeh it zzat i wudem n imeqqranen.

¹⁷ Wenni d amezwaru di tmesřact nnes ittbanen tsegged,
maca xenni ad dd-yas umqarreb nnes uca ittneceeb di tmesřact.

¹⁸ Taqedduħt ittejjan imenƧan ttbeddan
u tbeřta jar inni Ƨar teđa řsulta tameqqrant.

¹⁹ Ijj n uma nni umi di ggın řeib *ittwařtef ktar* x ict n tendint ijehden
u imenƧan ggın amecnaw zzekrunat n řeqsar.

²⁰ Zi řƧiĝet n uqemmm n ijj n weryaz ittyawan uēeddis nnes,
ad ijjawen zi řřabet n iyencicen nnes.

²¹ Řmewt d tudart deg ufus n Ƨiřeř
u kuř ijjen wenni ten ittexsen, ad yecc řƧiĝet nnes.

²² Wenni yufin tamƧart, yufa min iřebħen
u netta ittef řxađar n SIDI.

²³ S uħeccem issawař umezřuđ,
bu-wagřa *maca* ittarra-dd s řexcunet.

²⁴ Aryaz nni Ƨar ĝan imeddukař *ařtas*, ad iwđa di tamara,
maca ca n imuren ameddukeř ittexs i cek ktar zi tawmat.

19¹ Ĥřa ijj n umezřuđ igguren di teřdiqt nnes
x wenni Ƨar iĝan iyencicen faryen u *am* ubuhaři i *yeđa*.

² Břa tussna uřa d řeemar war iĝi ca mliħ
u wenni ittqeĝqen s iđaren *nnes*, ad ixđa.

³ Tubbuheřya n bnađem issfarray abrid nnes
u *xenni* uř nnes ad isear x SIDI.

⁴ Agřa ittawi-dd ařtas n imeddukař,
maca amezřuđ ittraħ umeddukeř nnes isemmeħ dayes.

⁵ Ijj n ucehhad issxarriqen war ittwaħesseb ca d amezdag
u wenni dd-yarexxun i ixarriqen, war ggur ad injem.

⁶ Ařtas ttzawgen zzat i wudem n ijj n umcennee
u kuř ijj ittexs ad Ƨiři d ameddukeř n weryaz i Ƨar iĝa terzifin.

⁷ Marra aytmas n umezřuđ carrhen t,
mečřař mma ttigg^wejjen xas imeddukař nnes!
Netta iđeffar awařen, inni war isekkwın walu.

- ⁸ Wenni ittarebban uř *nnes*, ittexs řeemar nnes, wenni iřetřtan řefhamet, ad yaf min icnan.
- ⁹ Ijj n ucehhad issxarriqen war ittwahesseb ca d amezdag u wenni yarexxun i ixarriqen, ggur ad ittwahellek.
- ¹⁰ Afeyyec war dd-yusi x ubuhaři, mammec ead x umsexxar mařend ad iselleř x řřukkam.
- ¹¹ Řeęeř n bnađem ittarra it ad igg s ttasie n řxađar u aqa d talwizt nnes mařend ad ikk x uęeddi
- ¹² Ahaji n uęeđid am zzhir n weyrad di temži nnes
maca řxađar nnes am nnda x arbię.
- ¹³ Mmis abuhaři d arzeyyet i babas u amcubbec n temyart igga am tuđdimt *n tzeęqa* war ięetřin.
- ¹⁴ Taddart d wagřa aqa-ten d řwart n ibabaten,
maca ict n temyart ifehhmen aqa-tt n SIDI.
- ¹⁵ Řeęgez yarra *bnadem* ad iwđa deg iđeř yuęyen u řeemar *iccur* s řyęcc ad ięaz.
- ¹⁶ Wenni iřetřtan tawřiyet, iřetřta řeemar nnes, wenni war iřetřin ibriden nnes, ad immet.
- ¹⁷ Wenni itthinnan x umezřuđ, yareřteř i SIDI u netta ad as ixęeę řxedmet nnes.
- ¹⁸ Webbex mmic, mařa ead din ca n usitem,
maca war tneęq ca, war teji ca ad iki-dd aya řeemar nnek.
- ¹⁹ Wenni iřman deg wesear, ad iki řexřař nnes, mayar mařa tersed ad t tessnejmed, ittxeřsa i cek ad daysent tarenyed.
- ²⁰ Seř cek yar ucawar uca qbeř awebbex, mařend ad tdewřed d miyis yar unęęgar.
- ²¹ Aqa din ařtas n ixemmimen deg wuř n weryaz,
maca ccwar n SIDI ittyma ibedd.
- ²² Tcuni n bnađem d řeđřafet nnes,
maca řsen ijj n umezřuđ x iji n bu-ixarriqen.
- ²³ Tigęwudi n SIDI tneddeř yar tudart, mayar itteřtes ijiwen, war ggur ad yares dd-yas ca min war iřřin.
- ²⁴ Ameęguz issnuffar afus nnes di třebsi u war t-i-dd-ittarri yar uęemmum.
- ²⁵ Wwet amestehziy, ammu i ya iften uqubbani u eaęeb afehham, *xenni* ad ikseb řefhamet.
- ²⁶ Wenni itteęgen yezzu di babas niy wenni issuffuyen yemmas, aqa d mmis n řefđiřet nni yarran *bnadem* ad isseđřa.
- ²⁷ Sbedd-dd, a mmi, mařend ad tesřed yar uwebbex mařa tersed ad tęeyded x wawařen n tussna iccuren.
- ²⁸ Ijj n ucehhad i war isekkwın ięeřter zi řęeęq uca aęemmum n ięeffanen řarręen řyęcc.
- ²⁹ Imestehzayyen ttrajan ad xasen řekmen u tiyyita i wecrur n ibuhařiyen.

20¹ Binu d wenni amestehziy, ccrab d bu-ssdec
u wenni zzayes i ya iweddaren, *emmarş* war iddikkwir d miyis.

² Ahuddi n ujeğid am zzhir n wayrad:

wenni t isseären, ixetța ak-d i řeemar nnes.

³ Asmağ deg umcubbec aqa d ccan i weryaz,
maca kuř abuhaři ggur ad t icqa.

⁴ Ameeguz war icarrez di řmecta,
xenni ad yarzu di tmeyra, *maca* war din ittif walu.

⁵ Ixarrišen deg wuř n bnađem am waman yuğyen,
maca ijj n weryaz s řefhamet issen ad ten yayem.

⁶ Ařtas n iwdan ttřayan x ca n iijen ‘ameddukkeř’,
maca aryaz ařdiq, man wen t i ya yafen?

⁷ Amseged iggur di teřdiqt nnes,
sseed n iřenjiren nnes i *ittejja* awarni as.

⁸ Ijj n ujeğid nni ittyiman x řkursi n ccrae,
ittřeffa marra řyar s tiřtawin nnes.

⁹ Wi izemmaren ad yini ‘Necc ssizedgey uř inu, necc izdigeş zi ddnub inu!’?

¹⁰ Ijj n řewzen d ijj n řewzen nneđni, ijj n ‘ifa’ d ijj n ‘ifa’ nneđni,
aqa-ten d nnei i SIDI, wah s tnayen idsen.

¹¹ Ağudri ittban di tmegga nnes
ma řxedmet nnes teřsa niğ aqa-tt nican.

¹² Amezzuy ittesřan d tiřt ittwařan, SIDI igga iten s tnayen idsen.

¹³ War ttexs iđeş mağend war teddikkwired d amezřuđ,
arzem tiřtawin nnek, ssiyiwen ixef nnek s weğrum.

¹⁴ War iğğři, war iğğři, i iqqar umsewweq,
maca mařa yuyur netta, *ammu* i ittcennee ixef nnes.

¹⁵ Urey iğa uřa d ařtas n tyaqutin,
maca iyencicen *ccuren* s tussna d ict n řqecceet iyřan.

¹⁶ Mařa iijen iddakkwař d ađman i yijj n ubarrani,
xenni ksi arruđ nnes u ksi t d arhan i yenni war ittwassnen.

¹⁷ D miziđ i bnađem ağrum n ixarriqen,
awarni as *maca* ad iccur uqemmmum nnes s iqayasen.

¹⁸ Ixemmimen ttekmiřen s ucawar.

X uyenni ndeh amenği s udebbar.

¹⁹ Wenni igguren da d diha s texbarjit, issearra min innuffaren,
war tsebbee ak-d wenni issřinniben s iyencicen iřebhen.

²⁰ Wenni ineeřen x babas d yemmas,
řefnar nnes ad ittwasseksi di tağest tabarcant.

²¹ Mařa tasyart tettwakeseb değya s tazřa deg umezwaru,
war tettwabarek deg uneggar nnes.

²² War qqar ‘Necc ad xeřfeğ řyar!’
Ttceř x SIDI, netta ad cek issenjem.

²³ Ijj n řewzen d ijj n řewzen nneđni, aqa-ten d nnei i SIDI
u řmizanat iyeccen war ġin ca mliğ.

²⁴ Işuraf n ijj n weryaz n SIDI,
xenni mammec i ya yegg bnađem ad issen abrid nnes?

20:18 ‘Ixemmimen’ - niğ ‘inwayen’ niğ ‘inekkwan’ niğ ‘ixarrišen’.

²⁵ Aqa-tt d taxceft i bnađem i ęa iřayan s uqeęeq ‘amqeddes’
u *ead* awarni lwueud nnes *i igga* ad ixarreř.

²⁶ Ijj n ujeęid miyis ittseffa ieffanen
u ittejja karru ad xasen iedu.

²⁷ Twarrit n nnefs n bnađem d řefnar n SIDI,
tenni yarezzun daxeř n ueddis nnes di marra ixammen.

²⁸ Tamexsiwt icewwaren d teřdiqt heřřant ajeęid
u řkursi nnes igellden issejhed it s tmexsiwt icewwaren.

²⁹ Talwizt n iħudriyyen d jjeħd nsen
u leađama n iwessura d acewwaf icaben.

³⁰ Iyazzimen ittazzřen s idammen ssizdigen zi řyar
u ccaten *iřeffa ead* uřa d takricť.

21 ¹ Uř n ujeęid am tięezratin n waman deg ufus n SIDI.
Netta ineddeh it, mani mma ixs netta.

² Marra ibriden n bnađem nican di tiřřawin nnes,
maca SIDI ittqeęab uřawen.

³ Wenni ittegggen tasegda d řęeqq
itteejib as i SIDI x *wenni iweħħben* taęarřť.

⁴ Nnfaxet n tiřřawin d uř icenęen
u timegga war itteffyen n ieffanen, d ddenb.

⁵ Ixemmimen n inni imeħđen *ttawyen* ęar ufeyyed,
maca marra wenni ittqeęiqen *ittawi* ęar řeħwej waha.

⁶ Asmuni n wagřa s yiřes issxarriqen,
amecnaw twarrit n nnefs iedduń deęya n yenni yarezzun řmewť.

⁷ Leunf n ieffanen ittjarra iten,
maęar ttagin ad ggen min isegģmen.

⁸ Abrid n weryaz i di ięa umarwas ifaryę,
maca wenni iřfan ittegg s teřdiqt.

⁹ Iħřa ad tzedyed deg ict teęmart n tzeqqqa
uřa *tazeddiťt* ak-d ict n teęmart ittemcubbucen deg ict n taddart tcarc.

¹⁰ Řeęmar n ieffanen ittmeęzi di řęar,
amęarreb nnes war ęares ittif nniemet di tiřřawin nnes.

¹¹ Mařa ittwaęeęeř umestehziy, iddakkwař uqubbani d amięis,
u mařa sřremden miyis, ikessi netta tussna.

¹² Amsegged ittbeqqec mliħ taddart n uceffan,
netta iyeřteř ieffanen di aręeyyet.

¹³ Wenni ittbellaęen amezzuę nnes ęar iyuyyan n imezřađ,
uřa d netta ad isęuyy *maca* war xas dd-ttarran.

¹⁴ Ssedqet di tnuffra tessřeħħu tafqeħť,
tarzeft deg weħsin *n warruđ* axeyyeq imyaren.

¹⁵ Aqa d ict n řefraħet i umsegged maħend ad igg min *ięan* nican,
maca d aceřwaw i yenni ittegggen řyecc.

¹⁶ Bnađem nni itteffyen zeg webrid n řeęeřť,
ad yareyyeħ deg wegraw *n řęgens* n řexyarat n imetttan.

¹⁷ Wenni ittexsen řefrařet, ggur ad iřwaj,
wenni ittexsen binu d zzećt, war ggur ad idweř d bu wagřa.

¹⁸ Aeeffan d ddeyyet i imseggaden
u d ayeđdar i iřđiqen.

¹⁹ Iřřa ad tzedyeđ di temmurt ixřan
uřa *tazeddiťt* ak-d ict n temyart ittemcubbucen u itteqqsen.

²⁰ Iji n řkenz d zzećt ittwařwajen aqa-ten di tzeddiťt n imiyyisen,
maca bnađem abuhaři iřarred it.

²¹ Wenni yarezzun x tsegda d tmexsiwt icewwaren,
ittaf tudart d tsegda d ccan.

²² Amiyyis iřebbec tendint n ijebbaren
u iyeťťeř jjeđd n ttiqet nsen di temmurt.

²³ Wenni iheťťan aqemmum d yiřes nnes,
iheťťa řeemar nnes zi řeřřarat.

²⁴ Bu-nnfaxet iffucčhen, tťřayan as ‘amestehziy’,
netta ittegg s nnfaxet.

²⁵ Ccehwet n umeeguz tneqq it,
mayar ifassen nnes ugin ad xedmen.

²⁶ Ass imun ieeceq timesřayin n weecaq
maca amsegged ggur ad iwc u war itteji ca awarni as.

²⁷ Tařarřt n ueeffan d nnei,
mahu mařa nitni ad tt awyen s unekkwi iyeccen.

²⁸ Iji n ucehhad issxarriqen ggur ad ittwaħellek
u aryaz nni ittesřan izemmar ad iqqim issawař řebda.

²⁹ Aryaz aeefan issejhed ixef nnes ak-d wudem nnes,
maca ařđiq issemten ibriden nnes.

³⁰ War teđi tiyit uřa d řefhamet
u war din iđi bu ucawar qibač i SIDI.

³¹ Ayis ad as řezzen i wass n umenyi,
maca ayeħleb řar SIDI.

22¹ Isem ařebħan iřřa x waťtas n wagřa,
nnieđmet teřřa x nnuqart d wurey.

² Bu-wagřa d umezřuđ ttemsagaren,
SIDI i ten iggin marra.

³ Bnađem ifetnen ittwařa řyar uca ittnuffar,
maca iqubaniyyen arennin gguren uca tettwaeeqaben.

⁴ řmunet i uwađeē *zi ssibet n tigg*^wudi n SIDI,
d agřa d ccan d tudart.

⁵ Isennanen d řefxux aqa-ten x webrid n wenni ifaryen,
wenni iheťťan řeemar nnes, ittyima řar řaggwaj nsen.

⁶ Darreb aħudri eħařsab řeqyas n webrid nnes,
waxxa netta iwsar, war xas ittheyyid ca.

⁷ Bu-wagřa ittřeđađ x imezřađ
u bu-umarwas d amsexxar n wenni i d as yareťťřen.

⁸ Wenni izarreen řyecc, ad imjar řeyben
u aemud n wesxeđ nnes ad ifna.

⁹ Wenni řar ięa řxezrat teřbeř, ad ittwabarek,
minzi netta itticc i imezřađ zeg weyrum nnes.

¹⁰ Azzeř x umestehziy, ad iffey řhemm
uca ad tbedd umřarwađ d řefđiřet.

¹¹ Wenni ittexsen řeřfayet n wuř,
wenni řar ięa iyencicen *iccuren* s nniemet,
ajeęid ad yiři d ameddukkeř nnes.

¹² Tiřřawin n SIDI řeřřant x tussna,
maca awařen n iyeddaren ad ten ibđeř.

¹³ Ameęguz iqqar 'Aqa din ijj n wayrad di barra!
Ad taę balak ad ttwanyeyu di zznaqi!'

¹⁴ Aqemmum n temřarin tibarraniyyin d ict tesraft yuęęen,
wenni x iffugem SIDI, ad dayes iwđa.

¹⁵ Tubbuřeřya *tettyima* tettwacedd deg wuř n uřudri,
tiyyita n uwebbex ggur ad tt tessuffey zzayes.

¹⁶ Wenni iřeřřaren amehđaj ad yarni di min ięan nnes,
wenni itticcen i bu-waęřa, ad iřwaj.

Awařen iweznen n ayt n tiyt

¹⁷ Ewc amezzuę nnek uca seř řar wawařen n imiyisen
u arr uř nnek řar tussna inu.

¹⁸ Maęar aqa mliř mařa cek txemmřed ten di daxeř nnek,
u ad ten tessewjded jmię x iyencicen nnek,

¹⁹ maęend ad yiři utecři nnek x SIDI,
ad ac ten tessecney řexxu, wah i cek.

²⁰ Ma zeema war d ac urię awařen yueřan ařřas,
ccurent s cwar d tussna,

²¹ řima ad ac ssecney řemten n wawařen n tidett,
maęend tzemmaređ ad dd-tarred x wenni cek dd-issekken.

²² War ttkeccađ amarxu maęar netta d amezřuđ
u war řebbez řmeskin řar tewwart,

²³ maęar SIDI ad asen yaę taęřart nsen
u netta ad ikecceđ řeemar n yenni iten ittkeccađen.

²⁴ War ttemddukkuř ak-d wenni ittarrujduden,
u war ttidef řar wenni umi iřemma uzeęif,

²⁵ maęend cek war tettnimid ca ak-d imesraq nnes
u ad tegged řfex i řeemar nnek.

²⁶ War ttiři zeg inni itticcen awař s tmewciwt n ifassen
zeg inni iđemmnen i imerwusa.

²⁷ Mařa war tzemmaređ ad txeęseđ,
mayemmi i d ac i řa nđaren zi qama nnek?

²⁸ War ssmuřřuy aymir n mečarř uya,

inni ggin ibabaten nnek.

²⁹ Ma teƷrid cek ijj n weryaz imeħden di řhirfa nnes?
Ad t ssbedden zzat i wudem n ijeĝiden,
war iĝi ad ibedd zzat i wudem n midden war di iĝi ttiget.

23¹ Mařa cek teqqimed ħar ttabřa ħar ijj n řřakem maħend ad tecced *akides*,
ħda mliħ min *iĝan* zzatek.

² Egg ijj n řmus x yiři nnek,
mařa cek d ijj n bu-řemyaret n ueeddis.

³ War ttegg meƷri di macca nnes icnan,
mařar aqa-t d macca n tuxxuna.

⁴ War ssiħiř ixef nnek ħima ad tdewřed d bu-waĝřa,
qimm tfetned ak-d ixef nnek.

⁵ Mařa tťawent tiťawin ħares, aqa war din *aĝřa* ead!
Ggur ad igg afriwen i yixef nnes amecnaw ijj n ugider nni iťťawen ħar ujenna.

⁶ War ttett ařrum n wenni di teĝa tiť taeffant
u war meƷri di macca nnes icnan.

⁷ Mařar am mammec t tuřa ittxarrař,
netta *ad ac iqqar* 'Ecc, teswed!',
maca uř nnes war akidek iĝi.

⁸ Azeēēif i teccid, ad t-i-dd-teuqqed
u awařen iřebħen nnek tĝeyyed ten.

⁹ War ssawař deg umezzuy n ijj n ubuhaři,
mařar netta ad isseħqar awařen n weftan nnek.

¹⁰ War ssmuťtuy aymir n meħař uya,
u war ttadef deg iyyaren n iyujiřen,

¹¹ mařar amefdi nsen d ameqqran,
netta ad dd-yay tasyart nsen zzayek.

¹² Arr uř nnek ħar uwebbex
uřa d imezzuřen nnek ħar wawařen n tussna.

¹³ War tetťef awebbex x uħudri,
waxxa teccated t cek s weemud,
war ittmetti.

¹⁴ Cek ggur ad t tewted s weemud
u ad tessnejmed řēmar nnes zi řaxart.

¹⁵ Mmi inu, mařa uř nnek d miyis,
ad ifarħ uřa d uř inu, wah uřa d necc simant inu.

¹⁶ Tizzař inu ad negzent s řefraħet
mařa iyencicen nnek ssiwřen min iĝan isegged. .

¹⁷ Ejj uř nnek war ittisim zeg iceffanen,
maca *ejj it ad yarr azeĝif* ħar tigg^wudi n SIDI ass imun!

23:16 'tyezzař' - ixs ad yini 'tizzař' niy 'tizezřin'.

¹⁸ Maɣar s tidett aqa din tiwecca
u řayas nnek war ittarezzi.

¹⁹ Seř-dd cek, a mmi, u iři d miyis
uca ndeh uř nnek ɣar webrid.

²⁰ War tɣyimi ɣar iskarjiyyen
uřa ɣar inni ilehhfen deg weysum,

²¹ maɣar askarjiy d amelhuf ad dewřen d imezřad
u anudem issiriđ deg ihřucen.

²² Seř-dd cek ɣar babac wenni cek i dd-ijjin
u war ssehqiri yemmac mařa tewsar.

²³ Sey-dd cek tidett maca war tt tezuza ca,
ammu uřa d tiyit d uwebbex d řefhamet.

²⁴ Babas n umsegged ad ifarħ s wařtas
u wenni dd-ijjin ijj mmis d miyis, ad as ifarħ.

²⁵ Ejj ad ifarħ babac uřa d yemmac,
ejj tenni cek i dd-yurwen ad tfarħ.

²⁶ Ewc ayi uř nnek, a mmi,
ejj tiřawin nnek ad afent řxađar deg ibriden inu.

²⁷ Maɣar řqeħba d ict n tesraft yuřɣen,
u tamɣart zi barra d ijj n řeunřar ihřar.

²⁸ Wah, nettat tetřhama am ijj n uxewwan
u tarenni deg iyeddaren jar iwdan.

²⁹ Wi i ɣar ięa wecđan? Wi i ɣar ięa zzeřđ? Wi i ɣar ięa umcubbec? Wi i ɣar ięa ucetci?
Wi i ɣar ięan iyezzimen břa ssibbet? Wi i ɣar ģant tiřawin bbarewyent?

³⁰ ɣar inni ittyiman ɣar binu ař tameddit, ɣar yenni dd-yusin, ģima ad qqasen binu ixegđen.

³¹ War xezzar ɣar binu, mammec ittezwiy, ittřiqřiq di řkas u netta ihwen *i tissi*.

³² ɣar uneggar ittyima izeeef am ijj n ufiɣar
uca itteja ssem am ict n třefsa.

³³ Tiřawin nnek ad twařant timɣarin tibarraniyyin
u uř nnek ad issiwiř s řyedran.

³⁴ Cek ad tiřid amecnaw ijjen i itteřřen di řwest n řebħar
u am ijjen i itteřřen di tqiccat n teħnact *n uɣarrabu*

³⁵ *ad tinid* "Wtin ayi, *maca* war yezzmey,
dexmen ayi, *maca* war uciy ak-d walu.

Meřmi i dd i ɣa faqeɣ? Necc ad arzuɣ eawed *ɣar binu!*"

24¹ War ttasem zeg iryazen ieffanen
u war arezzu ca tmunet akidsen.

² Maɣar uř nsen itteqer ɣar ureddeĝ
u iyencicen nsen ssawařen arziyyet.

³ Taddart tettwabna s tiyit
u tettwassemten s řefhamet,

⁴ s tussna ttwaemmaren ixammen n daxeř s marra aĝra iyřan d wagřa iřiqqen.

⁵ Aryaz miyis ijhed

u aryaz n tussna yarenni di jjehd nnes,

⁶ mayar ittxeṣṣa ad ittwandeh umenḡi s udebbar
u s řemyaret n umcawar ad yiři usenjem.

⁷ Tiyt tuεεra x ubuhaři,

netta war gğur ad yarzem aqemmun nnes di tewwart *n tendint*.

⁸ Wenni iεemmden *ad igg* řyar,

ad as řayan aqa bu-ixarrišen n tehřaymect.

⁹ Řemwayař n uxarreř n ubuhaři d ddenb
u amestehziy d nnei i bnađem.

¹⁰ Mařa tarxud cek zeg ixef nnek deg wass n řehřaret,
ammu uřa d jjehd nnek ad tettwařsar.

¹¹ Senjem inni ittwatřffen u ttwaneddhen řar řmewt,
inni ittmeyyřen řar mani ten i řa nřen, sbedd iten!

¹² Mařa cek ad tinid 'Xzar, aqa war nessin walu x man aya!',
ma wenni iwezznen uřawen, war t issargib?
Wenni iřetřtan řεemar nnek, issen it!
Netta ad ixεęę bnađem ełahřsab řxedmet nnes.

¹³ Ecc tamment, a mmi, mayar nettat teřbeř,
u tamment n teyrast aqa d tmiziđt i waney nnek.

¹⁴ Ammu i teęa tussna n tiyt i řεemar nnek.

Mařa tufid tt, *xenni* teęa tiwecca u trajit nnek war tettwaęetřεe ca.

¹⁵ A aceffan, war tettřama x tzeddiyt n imseggaden,
war heddem amcan n wareyyeř nnes!

¹⁶ Mařar amseggad ad iwđa sebea n twařawin u ad ikkar eawed,
maca iεeffanen ad wđan zi řřar.

¹⁷ War farreř i weřtu n řεeđu nnek

u mařa netta inqarđ, ejj uř nnek war ifarreř,

¹⁸ mařend SIDI war t iřarr u man aya ad yiři d řεib di titřawin nnes
u netta ad xas issřeyyed lřađab nnes.

¹⁹ War ttxeyyiq x wenni ittegggen řřar,
war ttasem zeg iεeffanen,

²⁰ mayar aqa wenni iteggen řřar war řares tiwecca,
řefnar n iεeffanen ad ittwasseksi.

²¹ A mmi, gğwed SIDI d ujeřid,
war ttxeęeđ ca ixef nnek ak-d yenni řar ięa řbar nneđni,

²² mayar ad dd-yas wareyyeb nsen deg ijj n umur
u wi issnen aneggaru n isegğwusa nsen?

²³ Uřa d yina d awařen iweznen n imiřisen.

Asfarz n wudmawen di ddeewet war ięi ca mliř.

²⁴ Wenni iqqaren i ueeffan ‘Cek d amsegged!’,
wanita ad t tneeřen řegnus, ad t carhen wayduden.

²⁵ *Maca* inni ten i ya iħakmen, ad iřin mliħ
u lbaraka s *marra* řxar ad ħarsen dd-tas.

²⁶ *am iijen* wenni issudumen iyencicen
aqa d wenni dd-ittarran s wawařen iseggmen.

²⁷ Sewjed řxedmet nnek barra uca kemmeř itt i ixef nnek deg iyyar
uca bna taddart nnek awarni man aya!

²⁸ War ttiři d acehhad břa ssibbet x umqarreb nnek.
Ma *tzemmared* ad tyarred s iyencicen nnek?

²⁹ War qqar ‘Mammec i d ayi igga netta, ammu i dd-as i ħa ggey uřa d necc!’,
mayar necc ad tt xeřfey zi marra elaħsab řxedmet nnes.

³⁰ Necc kkiy eduħ x yeyyar n iij n umeeguz
u x tzayart n iij n bna dem s wuř nnes war imtinen.

³¹ Xzar, tğaeed-dd xas marra teyzit,
tedřa tzeg^wart u dem n temmurt nnes,
u aqa řħiđ nnes n wezru ittwaħdem.

³² *Řami* tt zriy, ksiy tt ħar wuř inu,
zriy tt uca ksiy tt am iij n uwebbex.

³³ “Ejj ad tťseħ cwayt ead, cwayt drust n unudem,
cwayt drust n ubuzzeř s ifassen đeřšen,

³⁴ *dinni* dd i ħa yas zzeřđ nnek,
uřa d řeyben nnek am iij n weryaz s řesnaħ.”

25¹ Uřa d ina d awařen iweznen n Sulayman nni ittewaden urin ten iryazen n Ĥazaqiyya, ajeđid n Yahuda.

² Aqa d ccan n AREBBI maħend ad issar ict n tmesřact,
maca ccan n ujeđid maħend ad yarzu deg ict n tmesřact.

³ Řueřa n ujenna d řağay n temmurt
d wuř n ijeđiden war iğin i ubeqqec.

⁴ Kkes kuffu zi nnuqart
u ggur ad dd-teffey ict n řqecceet i wemziř.

⁵ Sbeeeed ieeffanen zi ztat n wudem n ujeđid
uca *xenni* ad ittwassemten řkursi nnes s tsegda.

⁶ War tfeyyec ztat i wudem n ujeđid
u war ttbeddi mani ttbeddan imeqqranen.

⁷ Maħar iħřa, ad ac inin ‘Gaeeed-dd da!’,
uřa mma ad cek dd-ssehwan ztat i wudem n iij n umcennee
nni zrin tiťtawin nnek.

⁸ War ttqeđiq ad tedeid,
mayar min tersed ad tegged ħar uneggar nnes,
mařa amqarreb nnek ad cek issefdeħ?

⁹ Carree ak-d umqarreb nnek,

maca war ssuffuɣ ssirr n wennedni,

¹⁰ *hima* wenni d as ittesraan war cek issheccem ca,
maɣar řexdenni war izemmar ad tettwasbeeed řefdihet nnek *ead*.

¹¹ *Am* titeffahin n wureɣ x tṭbasa n nnuqart,
ammu řan wawařen ittwassiwřen s řeqyas nnes.

¹² *Am* ict n txadent n wureɣ u *am* ict n tseddect n wureɣ iɣran,
ammu awebbex amiɣis ɣar umezzuy ittesraan.

¹³ *Am* wedfeř asemmađ deg ijj n wass n tmeyra,
ammu i ięa umsexxar ittammen deg wenni t issekkan,
maɣar netta issfaqa řeemar n bab nnes.

¹⁴ *Am* iseynuten d usemmiđ břa anzar,
ammu aryaz nni ameffar deg ict n terzeft icemmten.

¹⁵ S ttasie n řxađar ittwasseqnee ijj n řřakem
u iřes amiziđ ittarezza ixsan.

¹⁶ *Mařa* tufid tamment, ecc min teřwajed waha,
niɣ ad taff teccid ktar zi min teřwajed
u ggur balak ad tt-i-dd teuqqed.

¹⁷ War srrusa ađar nnek aṭṭas di taddart n umqarreb nnek,
niɣ ad cek ijjiwen u ad cek ieiiff.

¹⁸ *Am* wefđis d ssif d fritca iqeđeen,
ammu i ięa weryaz nni icehhdn s zzur x umqarreb nnes.

¹⁹ *Am* tiymest yarzen u *am* uđar inqrađen,
ammu i ięa utecri x wenni war di ięi ttiqet deg wass n řeřsaret.

²⁰ *Am* wenni ittekksen apartessu nnes deg ijj n wass ismeđ u *am* řxeę n niřrun,
ammu wenni ittyennajen izřan ztat i yijjen s wuř icđen.

²¹ *Mařa* wenni cek icarrhen ięuz, *xenni* ewc as aɣrum,
u mařa iffud netta, ewc as ad isu,

²² *maɣar* ammu i tyarrwed cek tirjin uyint x uzeęif nnes
u ggur SIDI ad cek ixęeęe.

²³ Asemmiđ zi ccamal ittawi-dd anzar,
ijj n wudem ixeyyqen iřes aęeddar.

²⁴ Iřřa ad tzedyed deg ict teymart n tzeqqa
uřa *tazeddiyt* ak-d ict n temɣart ittemcubbucen deg ict n taddart tcarc.

²⁵ *Am* waman iřemmađen i yijj n řeemar yuřeř,
ammu i ięa řexbar asebhan zeg ict n temmurt tigg^wej.

²⁶ *Am* ijj n řeunřar ittawafesden u *am* ijj n wanu ittawahedmem,
ammu i ięa umsegged ittzeezieen ztat i wudem n ieffanen.

²⁷ *Macca* n waṭṭas n tamment war ięi ca mliř,
maca tarezzut di tmesřayin yewearen d ccan.

²⁸ *Am* ict n tendint ihedmen břa řřiđ,
ammu i ięa ijj n weryaz war itteṭṭef buřbeř nnes.

26¹ *Am* wedfeř deg unebdu u *am* wenzar di tmeyra,
ammu war dd-ittis ccan ak-d ubuhaři.

² *Am* zzawec ittfararen, am tfařęest itřawen *ssa d ssa*,

ammu i tegga ict n necčret bŕa ssibbet, nettat war tŕeqqef. .

³ Arekkud i uyis, sŕimet i weyyur
u aemud i weerur n ibuhaŕiyen.

⁴ War ttarri x ubuhaŕi anect n tubbuheŕya nnes,
maħend uŕa d cek war dayes tarekk^wsed.

⁵ Arr x ubuhaŕi eļaħsab tubbuheŕya nnes,
maħend war ittŕiŕ netta d miŕis di titŕawin nnes.

⁶ Am wenni ittqessen idaren nnes u *am wenni* isessen leunf,
ammu i yeĝa wenni issekkan tibratin s ufus n ijj n ubuhaŕi.

⁷ Timessađin n umeđduŕ arehfent,
ammu i yeĝa uŕa d awaŕ iweznen deg uqemmum n ibuhaŕiyen.

⁸ Ameċnaw wenni itteddan azru iŕan deg iĝiy,
ammu i iĝa wenni iteggen ccan i ubuhaŕi.

⁹ Am ict n tiwent n tzeĝ^wart dd-iggaēden deg ufus n uskarji,
ammu i iĝa matal deg uqemmum n ibuhaŕiyen.

¹⁰ Aŕŕas zemmaren ad dd-saqaren zi mkuŕ řħajet,
maca wenni icarran ijj n ubuhaŕi, aqa netta d amcarray n yenni idđeyyaēen waha.

¹¹ Am ijj n weqzin iēeqben ŕar min iēuqq,
ammu itteawad ijj n ubuhaŕi tubbuheŕya nnes.

¹² Ma teŕriđ cek ijj n weryaz i iteggen ixef nnes d miŕis?
Aqa din asitem aŕŕas i yijj n ubuhaŕi uŕa xas.

¹³ Ameēguz iqqar ‘Aqa din ijj n wayrad ihajen deg webrid,
ijj n weyrad *yuyur* deg wazzaryen.’

¹⁴ Am tewwart tettunnuđ i teymart nnes,
ammu ittunuđ uŕa d ameēguz di qama nnes.

¹⁵ Ameēguz issnuffar afus nnes di tŕebši
aqa netta yuħeŕ maħend ad t issiweđ ŕar uqemmum nnes. .

¹⁶ Ameēguz ittwaŕa ixef nnes d miŕis
zi sebēa nni *izemmaren* ad dd-arren s řefhamet.

¹⁷ Am wenni ittcebbaren deg imezzuŕen n ijj n weqzin,
ammu i yeĝa wenni ittadfen deg ijj umcubbec nni war iĝi nnes.

¹⁸ Am ijj n umejnun
nni iccaten isefđawen d fritcat d *ssem* ineqqen,

¹⁹ ammu *i iĝa* weryaz nni icemten amqarreb nnes
uca iqqar ‘Aqa ttqessareŕ waha, niŕ lla!’

²⁰ Maŕa war iĝi ukeccuđ, ad texsi tmeŕsi
u maŕa war *din* iĝi uxbarji, yaessa umcubbec.

²¹ Am *iĝa* řefħem i tirjin yaryin d ukeccuđ i tmeŕsi,
ammu i issekkara ijj n weryaz ittemcubucen amenŕi.

²² Awaŕen n uxbarjiŕ am ħalawit
u nitenti hekkwant deg ixammen n daxeŕ n uēeddis.

²³ Am kuffu n nnuqart x uceĝiq n tŕaxt,
ammu i iĝan uŕa d iyencicen iħman d ijj n wuŕ aēeffan.

²⁴ Wenni di iĝa wecrah, issnuffara s yiŕes nnes
maca deg wuŕ nnes yarezzu netta řyecc.

26:2 ‘zzawec’ - niŕ ‘afrux’.

26:15 ‘aħsin’ - niŕ ‘abehŕur’.

²⁵ Maña netta ittħeccem s tmijja nnes, war t ttiqqa ca, maɣar seba n nneawat deg wuř nnes.

²⁶ Uřa maña iřehħef wecrah nnes deg wecmat, tuceffna nnes ad tettwaera deg wegraw *n řgens*.

²⁷ Wenni iyzin tasraft, ad dayes iwđa simant nnes u wenni isseqnunnuyen ict n teřđart, ad řares dd-tedweř.

²⁸ Iřes issxarriqen icarreħ wenni ittareddġen u ijj n uqemmum areqqay *s teħraymect* ittawi-dd řxirbet.

27¹ War tfeyyec zeg wass n tiwecca, maɣar cek war tessined ca min dd i řa yawi wass.

² Ejj ijj n ubarrani ad cek icennee, war iři aqemmum nnek, ijj n midden, war iři iyencicen nnek.

³ Ddqeř n wezru, řewzen n yejdi, *maca* afugem n ubuhaři idqeř x tnayen idsen.

⁴ Tafqeħt d udduqgez n ufugem aqa-ten qeřen, *maca* man wen izemmaren ad iqqim ibedd řar wasem?

⁵ Teħřa tarbiyyet s břayřay x tayri innuffaren.

⁶ Iyeczimen n wenni *cek* ittexsen aqa d řečřamat n teřđiqt, *maca* isudimen n yenni *cek* icarrhen aqa sennej i řečqeř.

⁷ Řeemar ijjiwnen ieejjen x tamment n teyřař, *maca* i řeemar iġuzen marra min yarezgen d miziđ.

⁸ Am ijj n wejdiđ iřaw *iggwed* zi řeucc nnes, ammu *i iřa* ijj n weryaz nni i řa iřelleen barra x wemcan nnes.

⁹ Zzect d řebxur ssfarraħen uř, ammu *ewwed* tamseeeaft icnan n ijj n umeddukkeř zi ccwar n wuř.

¹⁰ War semmeħ deg umeddukkeř nnek, uřa deg umeddukkeř n babac, war ttidef ca di taddart n umac deg wass n arziyyet nnek. Iħřa ijj n wajjar yudes x ict n tawmat tiggwej.

¹¹ Iři d miyis, a mmi inu, u sfarħ uř inu, maħend necc zemmarey ad arrey x wenni i d ayi i řa isseħqaren.

¹² Wenni ifetnen ittwařa řřar uca issnuffara ixef nnes *maca* iqubbaniyyen arennin gguren uca ttwaeeaqaben

¹³ Maña ijjen iddakkwař d ađman i ijj n ubarrani, *xenni* ksi arruđ nnes uca ksi t d arhan i yict temyart zi barra.

¹⁴ Wenni ittarken ameddukkeř nnes zic řar tuffut s tmijja ijehden, aqa man aya ad as ittwaħseb d nneeřet.

¹⁵ Tuddimt war ittbeddin deg wass n wenřar ijehden amecnaw ict n temyart ittemcubbucen.

¹⁶ Wenni ittexsen ad tt ibellee, *am wenni* ittexsen ad ibellee asemmiđ u afus nnes ad iřtef zzect.

¹⁷ *Am* weryaz isseqđæen uzzař s wuzzař, *ammu* isseqđæe ijj n weryaz udem n umqarreb nnes.

¹⁸ Wenni iħeṭṭan x ijj n wartu, ad icc řyığeṭ nnes
u wenni iħeṭṭan bab nnes, ad ittwaćennee.
¹⁹ Am mammec *teğa s* waman, ijj n wudem *arendad n* wudem nneḍni,
ammu *am tisit* wuř n bnađem i bnađem.
²⁰ Am řaxart war tzeṃmar ad tejjwiwen,
ammu uřa d tiṭṭawin n iwdan war zemarent ad jjiwnent.
²¹ Aṭenjir n usefsi i nnuqart d ufarran i wurey,
ammu i iğa uřa d aryaz ełahsab min imeddeħ.
²² Mařa tedzed abuhaři s wezduz d řmehraz jar řħebb n temzin,
tubbuheřya nnes war xas tħeyyid.

²³ Ĥđa maħend ad tessned mammec ittban wuđi nnek,
u wejjeh uř nnek řar tħimriwin nnek.
²⁴ Mařar řeksibet war tettiymi i řebda
niy mma ggur ad iqqim ttaj zi jjiř ař jjiř nneḍni?
²⁵ Mařa ittwakkess arrbię uca iban-dd uęemmuy *aziza*,
u ittwaħtec wefsu x idurar,
²⁶ *xenni ad iřin* izmaren i warruđ nnek
u iřayden i ttaman n tmeşyiwt i yijj n yeyyar
²⁷ uca ggur ad řarek yiři min teħwajed n uyi n tyaṭin,
am macca i taddart nnek uřa d řeęweč i tiywin nnek.

28¹ Ieffanen ttrakkwařen waxxa war *dinni* wi *iten* iđaffaren,
maca imseggaden daysen taryast am ijj n wayrad.
² Zi ssibbet n ueeddi n temmurt *ttekken xas* aṭṭas n řħukkam,
maca s ijj n bnađem s řeęeř d tussna ad iqqim řħeęq *ibedd* i yijj n řweqt d azirar.
³ Ijj n bab umesei u netta d wenni iħeşşaren imeħdajen,
am ijj n wenřar ittawyen marra *s manaya* war ittyimi ead weyrum.
⁴ Inni ittejjan ccariaę ssemyaran aęeffan,
maca inni iħeṭṭan ccariaę, tmenyan akidsen.
⁵ Iryazen ieffanen war fehħmen řħeęq,
maca inni yarezzun SIDI, fehħmen i kuřci.
⁶ Iħřa ijj n umezřuđ nni igguren di řekmaret nnes,
x wenni igguren x ibriden ifaryęn, *waxxa* netta d bu-wağřa.
⁷ Wenni iħeṭṭan ccariaę, d ijj n mmis ifehħem,
maca wenni d ameddukeř n imelhaf, yarra babas ad issedħa.
⁸ Wenni issemyaran ağřa nnes zi arriba d arbeħ,
issmuna aya i wenni itħħinnan x imeħdajen.
⁹ Wenni issħeyyaden amezzuę nnes zeg useđi n ccariaę,
ead tazađit nnes d nnei.
¹⁰ Wenni ittarran işdięen ad weddaren x ijj n webrid aęeffan,
netta simant nnes ad iwđa di tesraft nnes,
maca inni di teğa řekmaret ad warten min işebħen.
¹¹ Bu-wağřa i itteggan ixef nnes d amiysi di tiṭṭawin nnes,
maca ijj n umeħdaj nni di teğa řefhamet, yargeb xas.
¹² Mařa ad sřiwiřiwen imseggaden s řefraħet, aqa đin aęuđi ameqqran,

maca maŕa kkaren-dd ieffanen, ad issnuffar bnađem *ixef nnes*.

¹³ Wenni iddaŕen ixetŕan nnes, war ittefŕiŕ,

maca wenni zzaysen ineeemen u ittŕeyyad xasen, ad yaf arrahmet.

¹⁴ Sseed n bnađem nni ittegg^wden SIDI bŕa abeddi,

maca wenni isseqsahen uŕ nnes, ad iwđa di řyar.

¹⁵ *Am* ijj n weyrad ittarrujduden u *am* ijj n ddub ittazŕen zi ssa řar diha,

ammu iřa ijj n řhakem aeeffan x ijj n řgens amezŕuđ.

¹⁶ Ijj n řhakem nni iħwajen řefhamet u ittawi-dd řeřsaret aŕtas,

maca icarreh ŕŕmee, ad izzugart ussan nnes.

¹⁷ Ijj n bnađem ittwařsaren umi issizeŕ idammen n ca n yijjen,

ad yarweŕ řar wenđeŕ. War ttejji ħed ad t icawen.

¹⁸ Wenni igguren *abrid nnes* di teřdiqt, ad injem,

maca wenni igguren x tnayen n ibriden faryen,

war ittzeŕtar ad iwđa.

¹⁹ Wenni icarrzen tammurt nnes, ad ijjawen s weřrum,

maca wenni ideffaren ayt n farq-cyeŕ, ad ijjawen zzeŕđ.

²⁰ Aryaz di iřa řaman aŕtas *ad iksi* aŕtas n lbarakat,

maca wenni ittqeęiqen ħima ad igg agŕa, war ittwiħsib d amezdag.

²¹ Asfarz n wudmawen war ięi mliħ,

mařar i yijj n uŕeqquz n weřrum *izemmar* ca n weryaz ad igg ddenb.

²² Wenni ittqeęiqen řar wagŕa, aqa d aryaz s tiŕŕ n ueeqqar,

maca netta war issin aqa aħđaj ad řares dd-yas.

²³ Wenni itteaqaben ijj n bnađem, ad yaf nniemet řar uneggar,

ktar x wenni ittwařan s yiŕes nnes.

²⁴ Wenni ittkeccađen babas niy yemmas uca iqqar

‘War ięi d ddenb!’, aqa netta d acric n ijj n bu-řaxart.

²⁵ Wenni di iřa nnfaxet, issekkara-dd amcubbec,

maca wenni ittcařan x SIDI, ad idweŕ labas xas.

²⁶ Wenni ittcařan x wuŕ nnes, aqa d abuhaŕi,

maca wenni igguren abrid nnes di tiřit ad injem.

²⁷ Wenni ittccen i imezŕađ, war dayes ittiŕi bu řeyben,

maca wenni itteqqnen tiŕawin nnes, ad ittwaneeŕ aŕtas.

²⁸ Maŕa kkaren-dd ieffanen, *xenni* ittuffar bnađem,

maca maŕa ttwahellken nitni, ad dd-mmarenyen imseggaden.

29¹ Ijj n weryaz, wenni, awarni řami t eaqben aŕtas n twařawin, isseqsħen yiŕi *nnes*,
ad yarrez deg ijj n umur, *xmi* war din ięi ugenfu.

² Maŕa dewŕen imseggaden s tzemmar, *xenni* ifarreh řgens,

maca maŕa iħkem ueeffan, ad izhar řgens.

³ Bnađem ittexsen tiřit, issfarraħ babas,

maca wenni d amŕaħ n řeqħab, ittaredđaę agŕa *nnes*.

⁴ Ijj n ujeęid issbedda tammurt s řħeqq,

maca aryaz nni issgaeeaden đdariba aŕtas n twařawin, iheddem itt.

⁵ Aryaz nni isswařan amqarreb nnes,

ibezzeec ict n traccia i idaren nnes.

⁶ Deg ueddi n ijj n weryaz aeeffan *innuffar dayes* ijj n řfex,

maca amsegged ittesriwřew u ifarreħ.

⁷ Amsegged issen ddeewet n imħedajen,
aeffan *maca* war ifehhem tussna.

⁸ Imestehzayyen ssekkaran aýewwey di tendint,
maca imiyisen sseqřaben afugem.

⁹ *Mařa* amiyis iki-dd tanfuč i ijj n ubuhaři,
xenni iseeear wanita u ideħħec, břa mma i řa yareyyeħ.

¹⁰ Iryazen n idammen carrhen amezdag,
maca iřdiqen arezzun *ad ssejmen* řeemar nnes.

¹¹ Abuhaři ideęeq i marra buħbeř nnes,
maca miyis ittqemmee itt.

¹² Řřakem nni itticken taynit i řřard ixarriqen,
marra imsexxaren nnes *ad iřin* d ieffanen.

¹³ Amezřud d uđemmae msagaren, SIDI issnewwar tiřřawin n tnayen idsen.

¹⁴ Ajeęid nni itticken tasyart i imeħdajen,
řkursi nnes ad iqqim ibedd i řebda.

¹⁵ Arekkud d uwebbex tticken tiyit,
maca ijj n uħenjir jjin t i yixef nnes, ija yemmas ad tessedřa.

¹⁶ *Mařa* dewřen ieffanen jehden, *xenni* yarenni uxeřřu,
maca imseggaden ad řaren weřřu nsen.

¹⁷ Arebba mmic u netta ggur ad cek issareyyeħ
u netta ad iwc *lbarakat* timiziđin.

¹⁸ *Mařa* war din tamezriwt, ittuccuħ řgens,
maca sseed n wenni iħettan ccariea.

¹⁹ Ijj n umsexxar war itteji ad t arrebban,
mayar waxxa netta ifehhem xak, war xas ittarri ca.

²⁰ Ma cek *emmarř* war tezrid ijj n weryaz ittqeęiq s wawařen nnes?
Aqa din asitem ktar i ubuhaři uřa xas.

²¹ *Mařa* ittwassubeđ umsexxar zi temři,
ggur ad idweř řar uneggar war ittqidi.

²² Aryaz ittarrujduden isekkara-dd amcubbec
u ijj n bab n řesEur ittegg ařřas n ixetřřan.

²³ Nnfaxet n bnadem ggur ad t isswađee,
maca amwađee n buħbeř ad as ittugg ccan.

²⁴ Wenni ibetřřan ak-d uxewwan, icarreh ixef nnes,
mayar netta ittesřa i nneeret, *maca* war t iqqar ca.

²⁵ Tigge^wudi n iwdan tneddeħ řar řfex,
maca wenni ittcařan x SIDI, ad ittwasgaeeđ di řaman.

²⁶ Ařřas arezzun uđem n řřakem,
maca tasyart n kuř ijj tettas-dd zi SIDI.

²⁷ Aryaz aýeccac d nnei i umsegged,
maca wenni d ařđiq deg webrid nnes, aqa-t d nnei i ueffan.

Awařen iweznen n Ajur

30¹ Awařen n Ajur, mmis n Yakeh. Řħukm issnexřæen.
Awař n weryaz ijehden i Itiyil, i Itiyil d Ukal.

² Aqa necc d aqeffuħ n weryazen
u řefhamet n bnađem war ħari teĝi,

³ u necc war řmidey tiyit,
maħend ad ħari tiři tussna n Umqeddes.

⁴ Wi iġaæeden ħar ujenna uca ihwa-dd?
Man wen iyarwen ašemmiđ deg ifassen nnes?

Wi issennden aman deg warruđ?
Wi yarekknen marra tineggura n temmurt?

Man isem nnes u man isem n mmis,
mařa cek tessned t?

⁵ Marra tawařin n Arebbi ttwašeffant,
aqa netta d adurri i yenni xas ittcařan.

⁶ War arenni ħar wawařen nnes,
ħima netta war cek ittwebbex
u ad tbaned-dd cek d bu-ixarriqen.

⁷ Necc ttarey ac tnayen n tmesřayin,
war xafi tent qeřteę qbeř i ħa mmteę necc.

⁸ Sigg^wej xafi min ibeđřen d řħarđ ixarriqen,
war d ayi tticc zzeřđ uřa d wagřa,
seędu ayi-dd tasřart inu i d ayi dd-ittasen zeg weęrum,

⁹ mařa lla, xmi i ħa jjiwney, ad taę ad cek nkareę,
ad inię ‘Wi iġan d SIDI?’, nię xenni, mařa zeřđeę, ad acareę
u ad ggeę řeib deg yisem n AREBBI inu.

¹⁰ War ceqqef deg ijj n umsexxar ħar sides nnes,
ħima netta war cek ineeęeř u *xenni* ittxeřša i cek ad tettwafdid.

¹¹ *Aqa din* ijj n jjiř i ineeęřen babas
u war ittbarek yemmas,

¹² ijj n jjiř i *yeġan* d amezdag di titřawin nnes,
maca war ittwassird zi řexmej nnes,

¹³ ijj n jjiř s řxezrat inefxen
u s wabriwen nnes iġaæeden,

¹⁴ ijj n jjiř s teęmas am řesyuf u s teęmart am řemwas,
ħima ad řarđen imwađeen zi temmurt d imezřađ zeg iwdan.

¹⁵ Tadda ħares tnayen n yessis ‘Ewcl’ ‘Ewcl’
Aqa din třata nni eemmarř ad jjiwnen,
arebea eemmarř ad inin ‘Cfa!’

¹⁶ Řaxart d řemřawet ibelleen,
d temmurt i war ijjwnen eemmarř zeg waman,
d tmesi i iqqaren eemmarř ‘Cfa!’.

¹⁷ Ict n titř i issstehzan zi tbatat

u tessəḡqar tayemmat,
ad tt qeḡeen ibayḡriwen ɣar teɣzart
u imezɣanen n ugider ad tt ccen.

¹⁸ Tḡata-ya *n tmesḡayin* edunt ayi s ḡeḡjeb,
arebea war tent ssineɣ:

¹⁹ abrid n ugider deg ujenna, abrid n ufiyar tiwa n teḡdart,
abrid n uɣarrabu di ḡwest n ḡebḡar u abrid n weryaz s tḡarmuct..

²⁰ Ammu i tettegg abrid n ict n temɣart izennan:
nettat tettett, tessirid aqemmum nnes
uca teqqar 'Nec war ggij walu d ḡyecc!'

²¹ Sadu tḡata *n tmesḡayin-a* i tettenhezza temmurt,

sadu arebea nni war tzemmar ad teksi ḡeḡmeḡ:

²² sadu ijj n umsexxar maḡa netta idweḡ d ajeḡid
u sadu ijj n ubuhaḡi maḡa netta ijjiwen s weɣrum,

²³ sadu ict n temɣart tettwacarḡ maḡa nettat temḡec
u sadu ict n tesmeɣt maḡa nettat tuzzeḡ x lallas.

²⁴ Arebea-ya d imezɣanen qaε x temmurt,
εad nitni d imiyisen qaε.

²⁵ Tikeḡfin war ḡint d ḡgens ijeḡden,
maca εad nitenti ssewjadent macca nsen deg unebdu.

²⁶ Iḡarmcaren d ijj n ḡgens nhḡa jḡhed,
maca nitni bennan tazeddiyt nsen x teḡdart.

²⁷ Tamuyri war ɣares bu ajeḡid, *waxxa amenni* iffey s usettef.

²⁸ Azermummi tzemmed ad t teḡḡfed s tnayen n ifassen,
εad aqa-t netta di ḡeqsur n ijeḡiden.

²⁹ Tḡata-ya ḡsurufen s ḡeezz,
arebea gguren s tecḡi tecnee.

³⁰ Ayrad, bu-teɣruḡt jar ḡmar,
wenni war ittwexxiren zzat i ḡed.

³¹ Ijj n uɣiḡas nni itt saran s ḡeezz niɣ amyan
d ijj n ujeḡid nni ɣar iḡa uḡay n umenyi.

³² Maḡa cek teggid s tebbuheḡya am tesgacεaded ixef nnek
u am txemmmed di teḡraymect: sars fus x uqemmum!

³³ maɣar asendu n uɣi ittawi-dd trussi
u asendu n tinzar ittawi-dd idammen
u asendu n uxeyyeq, ittawi-dd amcubbec.

Awařen iweznen n yemmas n Lamuyil

31¹ Awařen n Lamuyil, ajeğid.
Rħukm issnexraeen i zi twebbex it yemmas.

² Min *din*, a mmi inu, min *din*, a mmi n weħsin inu?

Min *din*, a mmi n lwueud inu?

³ War tticc tizemmar nnek i temyarin
uřa ibriden nnek i tinni itthellaken ijeğiden.

⁴ War dd-tusi i ijeğiden, a Lamuyil, ad swen binu
uřa i yenni ħar teđa řřulřa ad mezren di ccrab.

⁵ Niĸ ad isuw u ad ittu lfariřa
u *xenni* ad issfary tanfuć n marra imxeyyben.

⁶ Ewc ccrab i yenni i ĸa ittawahellken
uřa d binu i yenni i di iğa wecđan amarzag di řecmar nsen.

⁷ Ejj it ad isuw u ad ittu zzeřđ nnes
u war ttxarrař di tamara ead.

⁸ Arzem aqemmum nnek i iziynan,
i tesyart n iyujiřen.

⁹ Arzem aqemmum nnek, ĸkem s řħukm nican,
ewc i umezřuđ tasyart.

¹⁰ Alif. Man wen i ĸa yafen ict n temyart imeħđden?

Ttaman nnes iedu marra tiyaqutin.

¹¹ Bat. Xas i ittcařa wuř n sidi nnes,
war d as ittxeřři řxir.

¹² Gimel. Nettet tettegg as min iřebħen u maci řyar,
marra ussan n tudart nnes.

¹³ Dalit. Nettet tarezzu tađuft d tiffest
u txeddem s ifassen nnes imeħđden.

¹⁴ Hi. Nettet tegga am tĸarrabut n usebbab,
zi řagg^waj tettawi-dd macca nnes.

¹⁵ Vaw. Netta tettnakkar umi ead teđa ĸiřet
u ttic macca i taddart nnes

u tasyart *nsent* i temsexxarin tibřiřin nnes.

¹⁶ Zayin. Nettet ttxarrař deg iyyar u tetteřteř it,
zi řyiřet n ifassen nnes tezzu ijj n weħwic n tzayart s ifassen nnes.

¹⁷ Xit. Nettet tbekkes tijeinna nnes s jjeħd
u tessemħađ iyağen nnes.

¹⁸ Tit. Nettet tħekkar i řefđeř n tsebbabt nnes,
řefnar nnes war ixessi di ĸiřet.

¹⁹ Yud. Nettet tesswizzeđ ifassen nnes ĸar trukka
u ifassen nnes třfen tazđa.

²⁰ Kaf. Nettet tarezzem afus nnes i tamara
u nettat tesswazzađ ifassen nnes i umezřuđ.

²¹ Lamid. Nettet war tettegg^wed zi taddart nnes di ssibbet n wedfeř,
mayar marra taddart nnes ĸares arruđ arjuwani.

²² Mem. Nettet tegga tisuntawin n zwaq,
arruđ nnes *zi* řeqřen azdad u *zi tcuqet* tarjuwanit.

- ²³ **Nun.** Aryaz nnes ittwassen di tewwura,
xmi ittyima netta ak-d imyaren n temmurt.
- ²⁴ **Samix.** Nettat tettegg arruḍ n arrimet uca tezznuza it,
nettat tezznuza ibuyas i Ukeneani.
- ²⁵ **Āayin.** Tizemmar d řeezz d arruḍ nnes
u nettat tdeḥḥec *tesfarnin* x wass i dd ya yasen.
- ²⁶ **Pi.** Nettat tarezzem aqemmum nnes s tiyit
u *aqā din* tyuri s tmexsiwt icewwaren x yiřes nnes.
- ²⁷ **Tsadi.** Nettat tḥeṭṭa x min ittemmsaran di taddart
u aḡrum n řeegez nettat war tettet .
- ²⁸ **Quf.** Iḥenjiren nnes ttekkaren u s řefraḥet ssemyaran tt ,
uřa d aryaz nnes ittmeddeḥ itt.
- ²⁹ **Rix.** Aṭṭas n tyessit ggint timegga jehdent,
maca cem teḍdud-dd ten marra.
- ³⁰ **Cin.** Řebhut tcemmet u azri ifenna,
maca tamḡart nni ittegg^wden SIDI, ad tt ssemyaren.
- ³¹ **Taf.** Wcem as řyiḡet n ifassen nnes,
u jjem timegga nnes ad as řebbḥent ḡar tewwura.